


# MWABA WÀ DIKUUKWILA

## MUSUNGULA WÀ NZAMBI

 Tùshaalààyikù biimànyine kuulu bwa katanci patùdi twinyika mitu yetu bwa disambila apa. Nenku mpindyewu, ne mitu yetu miinyika, ne ndi mutwìshìibwe ne, myoyi yetu kabidi mmiinyika, ndi ndikonka ne mbanganyi kaaba aka dilòòlò edi bàdi baswè bwa bàbàvùlùkèku mu disambila, bwa cintu kampanda cya pabwàci? Swàku wèlè anu cyanza muulu, wamba ne: “Nzambi, mpèèshèku dilòòlò edi cìndi nkèba eci.” Mukalenge ànùbènèshè.

<sup>2</sup> Taatù wetù wa mu Dyulu, patùdi tuseemena ne didipwekesha dyònsò ku Nkwasa wa butumbi wa ngâsa ewu apa, ku diitabuuja, tudi tuya mu myaba ya Dyàmwàmwa; mùdi Nzambi, ne Banjelo, ne Bakèlùbà, ne cilwilu cijimà cya mu Dyulu basangile. Bwalu Yèyè mmwambe ne kakwàkupòna nyuunyi wa mushààmushà nansha umwepele panshi Taatù wa mu Dyulu kàyi mumanye to. Ambààku tǔng mwàbèngàYe kumanya pàdi nkama ya bantu kaaba aka biikàle ne mitu yabo miinyika, ne bàKusòka bwa malomba a pabwàwù. Taatù, pwekèshàku mèsù pa bantu bàdi mu lukèngelu dilòòlò edi, bwalu twètù tudi cisàmbà cìdi mu lukèngelu.

<sup>3</sup> Nenku nyewu ndòmba, Nzambi, ne bwalu tudi basangile kaaba aka ne tujìkula Kùdi diitabuuja dyetu mu Nzambi udi ne mwoyi Utu cya bushuwa wàndamuna ku disambila; tudi bapàtùke mu bàà pa buloba bàdi kabàyi batengula, mwoyi ne maci, bapàtùke bwa kwikala ne nsòmbelu mutàpùlùke, ne bwa kwikala ne nsòmbelu wa dijìkula dya diitabuuja dyetu Kùdi. Dilòòlò edi nyewu tudi beelè byanza byetu muulu, twamba ne: “Tudi mu lukèngelu.” Nzambi munanga, andàmùnàku ku dyònsò dya ku malòmba abo.

<sup>4</sup> Ne pashìishe, Taatù, tudi tulomba bwa Wèwè kutùkùmbulakù dilòòlò edi mu Dìyi. Tudi balwè kaaba aka bwa dilongolodiibwa ku bilèma, bwa dyumvwa, bwa twètù kumanya anu mwa kwikala ne mwoyi mu dituku dya mpindyewu edi; cìdi cikèngela kutèkemena, cìdi cikèngela kwenza. Bwalu, tudi bamanyè ne Dilwa dya Mukalenge dikàadi dyènda dìseemena, bilondèshile bimanyinu byònsò byàkadyànjlàbo kwamba kùdi baprofeta. Tukàadi twenda tuseemena ku ciine cikondo aci, Mukalenge, pààfidiibwà disùngidiibwa mu kaabujimà kùdi bàna Beebe. Nzambi, enzàku bwa ne twètù, muntu ne muntu, twìkalakù kwòkò aku, Taatù. Swàku bwa kakùpangiki nansha umwe to. Ki kiipàcìlà keetu mu kwikala kaaba aka, Mukalenge.

Tudi baKunange, ne tudi tuteeta bwa kudilongolola bwa dîba adi.

<sup>5</sup> Akùlàku neetu, nyawu tulòmba cyakabidi, dilòòlò edi. Ne ondòpàku babeedi. Babeedi bònsò ne bàdi mu ntatu bàdi mu citanda emu aba, tudi tulomba bwa Wèwè kubòndopakù, Mukalenge; ne nangànangà aba bàdi ne majinga a nyuma. Tudi tulòmba bwa Wèwè kusùngilakù musuuka mujimine wònsò. Ujàku mwena kwitabuuja yònsò ne Nyuma Mwîmpè. Ne vwijùlùlàku dikàndà ne Bukole bipyabìpyà mu bânà Beebe bàdi biitábùùje. Enzàku bintu ebi, Taatù. Tudi tulòmba byàbùngì, bwalu Wèwè udi mutwàmbìle bwa kulòmba, “kulòmba tente mu nzubu tente pambelu, kulòmba bintu binène, byàbùngì,” bwa disanka dyetu dyàmòna mwa kukùmbana. Nenku tudi tubilòmba mu Dîna dya Yesu Kilisto. Amen.

Nudi mwa kusòmbaayi.

<sup>6</sup> Ncya bushuwa ne ndi mbala ne edi ndyèsè dinene dilòòlò edi, bwa kwikala baalùkìle cyakabidi kaaba aka ku cibumba cya ku cyambilu, mu cilogelu citùmbùke eci, bwa kwikalakù kumpala kwa bantu balenga aba bàdi basangile bwa kutèèleja Evanjeeliyo. Ndi ndòmba luse lwà kùdi Nzambi bwa kungabulwishakù bwa kunwàmbilakù Bulelela bilondèshile mùndìku pàanyi mumanye Bulelela amu. Yèyè ùcidi anu mwa kubwikidija muntu mukana, anu mùvwàYe mwa kukànga mukana mwa nyama wa ntambwe amu. Ne bu mèmè mwa kuteeta kwamba cintu kanà cyònsò cìdi cibì anyì cibèngàngàne ne diswa Dyèndè, disambila dyànyi dya meeji matòòke ndya ne Yèyè wàmbwidijakù mukana, bwa ncìcyàmbi to. Bwalu, mu bulelela, ndi muswe ngìkalakù mu Dyulu, mèmè mwine ewu; ne ncyènàku mufwànyine kwikalàmù, ne, pa kuumusha byònsò abi, ndi mufwànyine kwikala mulombodi mubi, muntu uvwa mwenze cintu kampanda mu mushindu mubi. Mèmè mucyènze, mbwalu ncyèna mumanye cikwabo cya dyenza to. Mukalenge ànùbènèshèku.

<sup>7</sup> Mpindyewu, mààlabà mu dinda, cyôci diswa dya Nzambi, ndi ne kiipàcilà kàà kwakula pa cyena-bwalu aci cya *Dibàkà Nè Difwà Dyà Dibàkà*. Ne tudi batwishùbwe ne nenùlwe, ne nenùlwe ne crayons yenu ne mabeji. Katwàkwangata ntàntà mupitèpìte bule to, kadi ndi muswe anu bwa...Ki cìvwà kiipàcilà kàanyi mu kwalukila kwa kaaba aka, dyambedi, mu Indiana, mùmvwà munùlayè cyôci aci. Nenku nènてete, mààlabà mu dinda. Mèmè ncìyi mucyàngàte mààlabà mu dinda to, nèncyàngàte mààlabà dilòòlò. Kadi nènてete mààlabà mu dinda, bu Mukalenge mwa kwanyisha, bwa kwakula pa cyena-bwalu aci, ngeelèlù yìbidi ya meeji ayi. Nenku Nzambi àtwàmbùlwishèku bwa kumanya cidi Bulelèlà, anu bwa kumanya cidi Bulelèlà, bwa twamònakù mwa kwendela mu Bulelèlà ne mu Bukènkè. Tudi...

8 Nudi bamanyè's, kale wàwa mvwa ne mulunda wa kale wa bafike. Wàkangambila, wàmba ne: "Mwaneetu Billy," yèyè ne, "mèmè—mèmè ncyèna muswe lutatu ku musulu to." Kwambaye ne: "Mèmè ndi muswe kwikala ne ticket wanyì ku cyanza. Ne pèèdiibwà kashibà, ncyèna muswèku lutatu kuntwaku to. Ndi mulombe Mukalenge, kùkaadi ntàntà mule ne, kwòkò cintu cibi, ncìlongòlòle anu mpindyewu," yèyè ne, "bwalu nekwikalè mîdimà ne bipeepèlè bikole bituuta mu dinda adi pààjuukà bwàtù bwa kuya dyàmwàmwa." Kwambaye ne: "Ncyènakù muswe dibwelakana nansha dikese to. Ndi muswe kutàngila bwalu bwa byònsò abi mpindyewu." Ki citùdi balwilè kaaba aka ncyòci aci, bwa kuteeta bwa kutàngila bwalu bwa dibwelakana dyònsò, bwa twamòna mwa kubànda mu bwàtù pa dibà adi.

9 Mpindyewu, ncyàkwakula neenu ntàntà mule menemene dilòlò edi to, bwalu tudi ne masangisha abidi mààlabà. Ne pashìshe ndi ngumba nya musangu wumwe, ku mwaba mukwabo, ku masangisha makwabo, makwabo kabidi.

10 Kadi, mpindyewu, mu Mukanda wà Dutèlònòmà. Ndi njinga kubala kuumukila ku nshapita wa 16, mvensa yisatu ya ntwàdijilu, ya Dutèlònòmà 16.1 too ne ku 3.

*Ùlamè ngondo wa Abibà, ne ùlamè paasàkà...  
MUKALENGE Nzambi webè, . . . mu ngondo (mwinâyì) wa  
Abibà uvwa MUKALENGE Nzambi webè mukupàtùle mu—  
mukupàtùle mu Èjiipitù bufuku.*

*Ki bwa cinyì neùlambulè paasàkà kùdi MUKALENGE  
Nzambi webè, ku bimunà ne ku ngombe, mu mwaba  
wùdi MUKALENGE musungule bwa kutèekayèmu dinà  
dyèndè.*

11 Mpindyewu, cyena-bwalu cyànyì dilòlò edi cìdi: *Mwaba Wà Dikuukwila Musungula Wà Nzambi.*

Nwènù baswe kumòna, ngondo wa A-b-a-d. . .-b awu ùdi, ùdi ùmvwija ne, "ngondo mwinâyì." Mu ngondo mwinâyì mmwàkabàpàtùlabò.

Nenku mpindyewu cintu cìdi cikèmeshà cìdi ne dilòlò edi, twètù bu bakuukwidi bàà Nzambi, mu dituku ditùdi ne mwoyi edi, ne tudi tusangana mmwènenu mishiilàngàne búngi cyanaànà ya bantu. Ne pàdiku mmwènenu mishiilàngàne pa cintu, kùdi nkonko mishiilàngàne; kùdi ne cya kwikala dyandamuna dilelela dimwepele ku lukonko lwònsò lùdi lwediibwe.

Bu mèmè mwa kwela lukonko elu ne: "Eci ncinyì?"

"Ee," mùdìbo bafwànyine kwamba, "ncyambilu."

"Ncya cinyì?" Nwamonu anyì?

12 Mpindyewu, mwaba awu, muntu mmfwànyine kwamba ne: "Kì ncyambilu to. Ndibaya." Ee, ndibaya, kadi nansha nanku's

ncyambilu. Nudi numòna's, bikèngela kwikalè dyandamuna dilelela dimwepele.

Nenku bu mèmè mwa kwela lukonko pa bwalu kanà bwònsò, bikèngela kwikalè dyandamuna dilelèlà. Kùdi mwa kwikala cintu kampana cya cifwànàngàne naadi; kadi kùdi ne cya kwikala dyandamuna dilelela, dya buludi ku lukonko lwònsò elu. Pa nanku, ki bwa cinyi, lukonko lwònsò lùdi lùjuukà mu nsòmbelu yetu, kùdi ne cya kwikala dyandamuna dilelela, dijaalàme.

<sup>13</sup> Nenku mpindyewu, leelu ewu, tudi tuumvwa—tuumvwa bambe, bantu beetu búngì cyaanàanà pa buloba leelu ewu. . .

Mèmè bu mpandanjila, nkàadi mwenzènze ngendu yàbúngì ya dikòsolola mbú ne diya dya pa buloba bujima, nkàadiku mupetàngàne ne ntendeleelu mishìilèshìilàngàne, bu mùdi Bouddha, ne ba-Mùzùlùmanyi, ne ba-Sikhs, ne ba-Jains, ne bakwabo, ya ku ntendeleelu ya pa buloba. Ne pashìishe muneemu mu Ètats-Unis wetù twètu ewu emu; ne mu makwabo matunga a ku baabèndè, ntu ntwilangana ne ekeleeziya yetu yònsò mishìilèshìilàngàne, bu mùdi ekeleeziya yetu ya cyena-mangumba, yibanga ne Ekeleeziya wa kumpala wa Katolike kàa cyena Loomò, ne pashìishe tuya ku wa cyena Ngelikà, ne mikwabo, ne mikiyà mi—mishìilèshìilàngàne, ne pashìishe tuya kabwela mu. . . bikonko byònsò bya cyena-mangumba abi, bya mangumba mashìilèshìilàngàne nkama citeema ne bya mu njila a cyena-Mishònyì.

Mpindyewu, yònsò wa ku yòyi, mu bushuwa bwa bwalu, nudi bafwànyine kumòna mmwènenu wabò, ne mèmè ncyèna mwa kubàdyula to. Dyònsò dya kùdiwu dìdi dyàmba mùdìbo bulelèlà, mùdìbo ne bulelela. Ne bantu bàà mu miine ekeleeziya ayi bìvwa bikèngela bìtabuuje ciine aci, bwalu mbeeyèke kwabo—kwabo kubàlongolwela, kwabo kubàlongolwela kwa Cyendeleelu, pa dilongesha dya yèyè ekeleeziya awu. Ne yòyi mmishìilàngàne bikole be, ewu ne ewu, mu mushindu wà ne mmijuulè nkonko mishìilèshìilàngàne nkama citeema ne bya mu njila.

Ki bwa cinyi, bu mùdiku nkonko mishìilèshìilàngàne nkama citeema ne bya mu njila, bikèngela kwikalè Dyandamuna dijaalàme dimwepele. Nenku ndi muswe bwetu twètu dilòòlò edi, bu mùdìbi ne tudi tutèeta bwa kuya mu Dyulu, ne kutwilangana ne Mukalenge wetù Yesu Utùdi bònsò banangè awu, ndi muswe kukenketa mu Mifundu bwa kupeta cyòci aci.

<sup>14</sup> Mpindyewu, cyòci ciikàle lukonko lwà mu Bible, dìbà adi's bìvwa bikèngela lwikalè ne dyandamuna dya mu Bible. Kabìvwa bikèngela kwikaladi mwa kufumina kùdi kasumbù kampana kàa bantu, kùdi bwobumwe kampana, anyi kùdi mulongeshanganyi, anyi kùdi dingumba kampana nansha. Bìvwa bikèngela bwa kufuminadi buludi mu Mifundu, mùdi mwaba wa kutwilangana ne Nzambi wùsanganyiibwa,

wa dikuukwila. Ne cya bushuwa, Yêyè mwikàle Nzambi, kùdi mwaba wa kutwilangana mwaba kampanda, wùdiYe ùtwilangana.

<sup>15</sup> Mpindyewu, tudi tusangana kaaba aka ne mu Dutèlònòmà emu, ku cibangidilu, Mòsà mwikàle wàmbulula Mufundu awu, bintu byàkabàmbilàye abi, mwàkabàpàtulàYe ne diboko dinene, dya makàndà, mu Èjiipitù, ne mwänjìye kubàjaalamija.

Bàakabiikidiibwa ne “ncisàmbà cya Nzambi” too ne pààkapàtukàbo mu Èjiipitù, ki pashiishe kubiikidiibwabò ne “ng’ekeleeziya wa Nzambi.” Bwalu, ekeleeziya ùtu ndisangisha, anyi, bwa kwamba kwìmpè, *ekeleeziya* mbwena kwamba ne “babìikila bwa kupàtuka,” aba bàdìbo babìikile bwa kupàtuka. Nenku bààkapàtuka mu Èjiipitù, bwa kwikalabo ekeleeziya.

<sup>16</sup> Mpindyewu Nzambi wàkabàmbila, pàvwàbo...kumpala kwa kwasabò ntempelu ne cyònsò ciine cyàkenzàbo aci ne: “Mémè nènsungulè mwaba wà diNkuukwila, ne Nènteekèmu Dìná Dyànyì.” Nenku ki mwaba wumwepele wùdi Nzambi mufwànyineku kutwilangana ne muntu kanà yònsò ewu, cìwwa nku disungula Dyèndè Yêyè mwine. Yêyè ngwàkasungula mwaba Wèndè awu, ne mwaba wàkasungulàYe mwaba Wèndè awu, ngwàkatèèkàYe Dìná Dyèndè. Mvènsa mwi2 ewu ngudi ùtwàmbila ne: “Yêyè uvwa mwa kutèeka Dìná Dyèndè mu mwaba wùvwàYe musungùle bwa bantu kuMukuukwilabò mwòmò.” Mpindyewu, bwalu bùdi mwaba awu bùdi ne, tudi baswe kupeta kùdi mwaba awu wùsanganyiibwa.

<sup>17</sup> Ne mmwènenu nkama citeema ne bya mu njila, bu mùdìbi ne tudi tushìya ku luseke ntendeleelu yònsò wa cimpàngaanù, tudi twakula anu bwa ntendeleelu wa bwena Kilisto nkààyèndè. Mbushuwa ne, mémè ndi ne njiyà kampanda bwa bampàngaanù, bwa cyanàànà ncìvwaku bulelèlè mufwànyine kuya kuntwaku ne kwakula naabo to. Kadi, bôbò bàdi mu ntùpàkanyì. Bwena Kilisto ki ntendeleelu umwepele udi mulelela, mbwena Kilisto. Nenku mémè ncyèna ngamba aci menemene anu bwalu ndi mwena Kilisto to; mbwalu, ndi ngiitabuuja ne cyòcì aci ki Bulelela. Ki ntendeleelu umwepele udi wa cya bushuwa.

<sup>18</sup> Nkààdikù mukafikè ku lukita kùdìbo bàshintulula kabalu katòoke paanyima pàà mèbà ònsò anaayi aku. Kùvwa, Mahomet, mwakwidi munene ne—ne mulombodi ùvwa mulwe dyàkàamwe paanyima pàà Kilisto awu, mwangàcìbwe bu muprofeta, ne, mémè ncyèna ngeela mpatà ne ncìvwàye to, paanyima menemene pàà ba-frères Maccabées. Kadi pàvwàbo... Yêyè kufwàye. Ùvwa mwambe ne ùvwa mwa kubìika ku lufu ne kukwata buloba bujimà. Mpindyewu, paanyima pàà mèbà anaayi ònsò bàdi bàshintulula bamulami, ne bàdi bàlama kabalu katòoke ku lukita lwèndè aku. Bôbò, munda mwa bidimu binunu bibidi, mbatèkèmène ne yèyè neàbìike ku lufu bwa kukwàtayè buloba. Kadi nudì numòna...

<sup>19</sup> Kadi paùdì uya kùdì Bouddha; Bouddha wàkashààla ne mwoyi kùkaadi bidimu nkama yàbùngi, kùkaadi bidimu bitwè ku binunu bibidi ne nkama yisatu, nzambi wa—wa Japon awu. Ne yèyè uvwa mwena nkindì, byenzè mùvwà Confucius, ne bakwabo abu.

Kadi bônso aba, bwa. . . bajuudi aba, ne bikwabo, bônso abu bàakafwà ne nkindì yabo ayi, ne bàakabàjiika ne bàdì bàsanganyiibwa mu lukita.

Kadi bwena Kilisto, bùdì bwasa kùdì Yesu Kilisto abu, kùdì lukita munda mutupù. Yèyè ki uvwa Muntu umwepele wàkiimanakù pa buloba, ne wàkadikù ne mwoyi ne wàkamba ne: “Mémè ndi ne bukole bwa kutèeka mwoyi Wányi panshi ne kuwùjuula cyakabidi.” Ne Yèyè wàkacyenza. Ne Yèyè ùdì ne mwoyi leelu ewu.

Ne tudi bamanye ne Yèyè ùdì ne mwoyi, bwalu Ùdì neetu ne ùDijaadika ku bimanyinu ne maalu a kukema bya mu mubidi, byàkalayàYe ne Ùvwa mwa kwenza bwa kucileeja. Mu mushindu wà ne, Dikunji dya Kapya dyàkalombolà bânà bàà Izaleela mu cipeela adi, Didi neetu leelu ewu, diDikwàcishe mene ne fòtò; dyènzà bimanyinu ne maalu a kukema byàkalayàYe ne neDyènzè mu dituku edi, tumòna Mèyì ònsò àkalayàYe awu munkaci mwa kumweneshiibwa mu dituku edi. Nenku, bampàngaanu bakwabo katwèna tubàbala to. Mbwena Kilisto!

<sup>20</sup> Mpindyewu, bu mùdiku nkonko nkama citeema ne bya mu njila bwa mwaba wùdì Nzambi ùtwilangana ne muntu ne: “Yèyè ùdì ùtwilangana ne ba-Méthodistes, anyì Ùdì ùtwilangana ne bantu mu ba-Baptistes, ne Ùdì ùtwilangana naabo mu *cikampanda*, ne *cikansanga*, ne *cikankenga*.” Mpindyewu, kudi lukonko mwaba awu, pa nanku bikèngela bwa muntu ne muntu àkebè lupandu lwèndè yèyè mwine ne dicìina ne dizakala.

Kadi dilòlò edi ndi muswe kuteeta bwa kupeta, ne kujaadika mu Mifundu ne, mpenyì pàdì mwaba wà mujaalàme wùdì Nzambi ùtwilangana ne ùkuukwila ne bantu. Nenku, pìikalàbi ne ncyòci aci, ki mwaba wumwepele wikalàYe mwa kutwilangana ngwòwò awu.

<sup>21</sup> Mpindyewu, twangàci cyena-bwalu eci mu Dutèlònòmà. Mmwaku wa mu cyena Ngelikà mwikàle ne dyumvwija pàbidi, anyì, wùdì wùmvwija ne, “mikenji yibidi.” Mwaku wa mu cyena Ngelikà, *Dutèlònòmà*, wùdì wùmvwija “mikenji yibidi mishìilàngàne.”

Nenku anu aci ki cìdì naaci Nzambi, mikenji yibidi mishìilàngàne. Ne wumwe wà ku yòyi mmukenji wà lufu, ne mukwabo mmukenji wà Mwoyi. Nzambi ùdì ne mikenji yibidi. KuMulonda, ne kuMukwàcila mudimu ne kuMukuukwila, ki Mwoyi; kuCibènga ki lufu. Kùdì mikenji yibidi mu Nzambi.

<sup>22</sup> Mpindyewu, wùmwe wà ku mikenji ayi wàkajingul-... bàakawùjingulwila bàà pa buloba, ku Mukùnà wà Sinaayi. Nzambi wàkafila mikenji kùdì Mòsà ne Izaleela. Kí nne mikenji yìvwa mifwànyìne kubàmbulwisha to, kadi mikenji yìvwa anu yibàfunkuna ne mbangènzàmpèkààtù. Too ne ku ciine cikondo aci, kabàvwa bamanyè civwà mpekaatu to, too ne pààkalwàbo kupeta mukenji kampanda. Kakwèna mwa kwikala mukenji kakùyì cibawu to. Mukenji kawèna mukenji pàdiku kakùyì cibawu to. Nenku, ki bwa cinyi: “Dishipa dya mikenji mmpekaatu, ne difutu dya mpekaatu ndufu.” Nenku ki bwa cinyi, pàvwa Nzambi kàyi mubènzèle mikenji, kakùvwa dishipa dya mikenji dibàbadila to.

Kwòkù kakùyì mukenji mwab’ewu wà ne kwèna mwa kunyeema kupicisha kilòmèètà makumi asatu ne yibidi ku dîbà dimwe to, dîbà adi’s udi mwa kunyeema kupicisha kilòmèètà makumi asatu ne yibidi ku dîbà dimwe. Kadi pàdìkù mukenji wàmba ne kwèna mwa kunyeema nanku, dîbà adi kudi mukenji ne cibawu ciwùlonda.

<sup>23</sup> Mpindyewu, lufu, mukenji wà lufu, wùvwa mmèyì matùma mafila pa Mukùnà wà Sinaayi, àvwa àmbila muntu mùvwàye ngènzàmpèkààtù. Nenku, kushipa kwa mukenji wà Nzambi, yèyè ùvwa ùfwa. Kadi kakwènakù lupandu mu mukenji to. Wòwù... wùvwa anu mpulushi cyanààna uvwa mwa kukwela mu bùlokò; kàyi ne cya kukupàtwishamù naaci to.

Kadi pashìishe kufilaYè mukwabo mukenji, awu mpa Mukùnà wà Kalvariyo, kwàkabadibwà mpekaatu mu Yesu Kilisto, ne kwòkù nkwaakafuciibwà cibawu. Nenku kí nne... Kí nku mukenji to, “kadi ku ngàsà nkunùdì basùngìdìibwe,” ku ngàsà wa Nzambi, ku didyànjila-kulongolola dya didyànjila-kumanya dya Nzambi dya buumùntù bwebe.

<sup>24</sup> Mpindyewu tudi tumòna mikenji yibidi eyi, Dutèlònòmà, wàkula bwa mikenji yibidi. Kùvwa mikenji yibidi. Wùmwe wùvwa mmukenji wà lufu, ne mukwabo mukenji wà Mwoyi.

<sup>25</sup> Kùvwa kabidi bipungidi bibidi bipèèsha bantu. Netwàkulè pa byòbi abi mu dinda.

Cimwe cya ku byòbi bàkacipèèsha Adàmà ku mushìngà ne, “wèwè mwenze *çikampanda* ne kùyì mwenze *çikansanga*,” kadi mukenji awu wàkashipiibwa. Adàmà, Evà kushipaye cyòci aci, mu budimi bwa Edènà.

Pashìishe Nzambi kwenzaYe cipungidi ciibìdì, ne kucipèèshaYe Abraham, ne awu mukenji wùvwa wà kakùyì mishìngà to. “Kí ncyùdì wèwè mwenze anyì ciwènzà to;” Yèyè mmwambe ne: “Mémè nkàadi mumane kucyènza.” Ki ngàsà nyèyè awu. Ki mukenji wà Mwoyi ngwòwò awu. Nzambi ùkaavwa mwenze aci bwa Abraham ne Dimiinu dyèndè paanyima pèndè, mbwena kwamba ne, Dimiinu dya Abraham dijimà.

Mùdì Bible mwambe ne: “Izaleela mujimà neàsungidiibwè,” kadi aci kacỳèna cyùmvwija ne mbeena Yuda to. Mwàkambà Pòlò ne: “Aba bàdì Izaleela munda, anyi Izaleela pambelu.” “Pambelu,” mutwãmbi dilòòlò adi ne, bàvwa mbànà bàà Izàkà, ku disangila dya mulume ne mukaji. Kadi mukenji wà Nzambi wùvwa nku Kilisto, ùvwa Dimiinu dya Bukalenge dya Abraham, ne, “ku ngàsà Izaleela mujimà neàsungidiibwè.” Mbwena kwamba ne: “Bònsò bàdì mu Kilisto nebàsungidiibwè,” bònsò, cipungidi ciibìdì cya Nzambi. Kadi bintu byònsò ebi bìvwa bileeja Kilisto mu cimfwànyì.

<sup>26</sup> Mpindyewu mònaayi mvensa mwi2. Mvensa mwi2 mu Dutèlònòmà 16 emu: “Ùkuukwilè mu mwaba wùndi Mémè musungùle.” Mpindyewu wèwè udi ne cya kukuukwila Nzambi, Yèyè mmwambe ne: “Mu mwaba wùndi Mémè musungùle,” kì ngùdì muntu mukwabo kampanda musungùle to, kadi, “wùndi Mémè musungùle.”

Mpindyewu, piikalà Nzambi musungùle mwaba, dìbà adi's bìdì ne mushinga kutùdì bwa kujandula cìdìYe mwambe pa bwalu abu. Ne wòwò awu wùdì penyi? Mémè ndi muswe kuwùpeta, bwalu, mu bulelela, ndi muswe kuMukuukwila.

Tudi bònsò kaaba aka, dilòòlò edi, bwa kuMukuukwila. Tudi basòmbe kaaba aka dilòòlò edi, bu ba-Méthodistes, ba-Baptistes, beena Katolike, ba-Témoins de Jéhovah, beena Science Chrétienne, ne bònsò abu, kadi tudi bònsò munkaci mwa kwenda kukèbangana ne cintu kampanda.

Tudi baswe kumanya Bulelela. Bible mmwambe ne: “Nenùmanyè Bulelela, ne Bulelela nebùnùpèèshè budishikaminyi.”

Muntu kampanda, kwèna mwa kumanya cyùdì wenza to, kwèna mumanye mwa kucyènza paùdì kùyì mumanye mwa kucyènza to; to, kwèna mumanye cya dyenza paùdì kùyì mumanye mwa kucyènza's wè. Udi ne cya kumanya cyùdì wenza ne mwa kucyènza mwine.

<sup>27</sup> Eci cìdì citùleeja ne Nzambi ùdì ne mwaba wà ditwilangana bwa bakuukwidi Bèndè, mu mwaba kampanda wumwepele. Anu mu wòwò mwaba awu, nkààyaawù, ngùdì Nzambi ùtwilangana ne bakuukwidi Bèndè.

<sup>28</sup> Mpindyewu, kabidi, mwaba wùdìYe musungùle bwa bakuukwidi Bèndè awu, Yèyè mmwambe ne ki mwàtèèkàYe Dìna Dyèndè. Mpindyewu tùkenketàayi bwa kupeta, ku Mifundu ne, mpenyi pàdì mwaba ewu wùsanganyibwa. Bushuwa, piikalàbi ne Nzambi mmwambe ne Yèyè neàteekè Dìna Dyèndè mu mwaba wùdìYe musungùle bwa kutwilangana ne bantu ne kukuukwila pamwe naabo ewu. . . to, anyi bòbò bàMukuukwila's wè, bwa ne mmu mwaba kampanda mu Bible, bwalu wùkaavwakù munda mwa bikondo byònsò.



<sup>29</sup> Ne Nzambi munene utu kàyi ùshintuluka awu kèna mwa kushintuluka nansha. Muntu yèyè ùdi ùshintuluka. Kadi udi mwa kutèeka mwoyi wèbè pa cintu kanà cyònsò cikaadiku Nzambi mwambe dībà kanà dyònsò, bwalu cidi Bulelela. Cidi Bulelela. Bwalu, ki cintu cimwepele cindiku mwa kutèekèla dyeyemena, m'Bible. Bwalu, dīyī dya muntu nedipangilè, kadi Nzambi Yèyè ùdi kumutu kwa bònsò.

Cidimu eci bìwva bìkèngela mmanye bitàmbe mûmvwà mumanye cidimu cishààle. Bidi nanku, bwèbè pèèbè, dituku dyònsò. Twètù tudi ne mikàlu, pa nanku tudi tusàkidila dimanya.

Kadi Nzambi kèna ne mikàlu to. Yèyè kèna ne mikàlu to. Nenku, mu kwikala kàyi ne mikàlu, Yèyè kèna mwa kusàkidila dimanya to. Yèyè mmupwàngàne, anu kwònsò aku. Bitu bìkèngela bwa dipangadika dyònsò kwikaladi anu dijaalàme anu menemene.

<sup>30</sup> Ne mushindu wàkenzà Nzambi musangu kampanda, Ùdi ne cya kwenza mushindu awu kashidi, bwa cyanàànà Ùvwa mutùpàkàne pàkenzàYe musangu wà kumpala apu. Piikalàbi ne muntu wàkalwakù kùdì Nzambi bwa lupàndu, pa cishìmikidi cyàkamwitabilàYe aci, bìkèngela cìitabiibwè pa cishìmikidi cimwecimwe aci musangu wònsò. Ncya bushuwa. Piikalàbi ne muntu wàkalwakù kùdì Nzambi bwa dyondopa dya kùdì Nzambi, ne Nzambi kumwitabaYè pa cishìmikidi kampanda, muntu udi ulonda yèyè mulwe, bìkèngela Yèyè kumwitaba mushindu wumwewumwe awu, bwa cyanàànà Ùvwa mutùpàkàne pàkiitabàYe muntu wà kumpala awu. Nzambi wàkatèeka cishìmikidi cìvwàYe mwa kutwilanganapù ne muntu. Wàkatèeka cishìmikidi bwa cìvwàYe mwa kwenza, mùvwàYe mwa kucyenza, ne cìvwa nku mashi a mulàmbù wà mwànà wa mukooko mu budimi bwa Edènà. Kacya Nzambi kàtukù mucishintùlùle to, musangu nansha wumwe, kacya.

<sup>31</sup> Wàkangata dipangadika dya mùvwàYe mwa kusungila muntu. Tudi twètù bateetètèete leelu ewu bwa kubwejamu muntu ku dimulongesha dya tulaasa; tudi bateetè bwa kubàbweja mu tulaasa, bateetè bwa kubàlongesha tulaasa, bateetè bwa kwenza mangumba, bateetè bwa kwenza bintu bikwabo bya mishindu yònsò ebi; kubàbwejamù, kubàbweja ku dibànyùkusha, kubàbweja ku dibàbàtiiza, mushindu mukwabo wònsò wùdiku awu, kubàbweja ku mikanda mifundilangana. Kadi, mbishààle anu bya mwomumwe, Nzambi ùdi ùtwilangana ne muntu mwinshi mwa Mashi meela panshi a Mwànà wa mukooko. Mashi ngàvwà mushindu wà Nzambi ku cibangidilu, ne Mashi ngàdì mushindu wà Nzambi dilòlò edi. Mbimpè bwa kwenza didikèngesha ne bintu byònsò ebi, kadi lupàndu lùdi lùfùma anu ku Mashi nkààyaawù. Mashi ki mushindu wumwepele wàkasungulà Nzambi bwa kusungila muntu, ne Yèyè kèna mwa kucishintululakù to.

<sup>32</sup> Yobò ùvwà ne cintu cimwecimwe aci. Ùvwà mumanye ne ùvwà mwakane, bwalu wàkalambula mulàmbù wà—wà mashi wùvwà Nzambi mumulòmbe.

<sup>33</sup> Mpindyewu, tùkenketàayi mpindyewu bwa kumòna cìdì wòwò mwaba ewu, ne mwaba wùdìYe mutèèke Dìnà Dyèndè. Nebikengelè bwa twètù kujandula ne mpenyì pàdìYe mutèèke Dìnà Dyèndè. Dìbà adi, twètù bajandùle cìdì Dìnà dya Nzambi ne mwaba wùdìYe muDitèèke, dìbà adi twâpeci mwaba wà dikuukwila patùdì anu ne twâpeci cyôci aci.

Bintu byònsò ebi, mu bushuwa bwa bwalu, bìvwà mindidimbi ya bintu bicìvwà bìlwa. Mikenji yònsò yìvwà yileea mu cimfwànyì bintu bicìvwà bìlwa.

<sup>34</sup> Anu mùdìbi ne, ngondo mmundidimbi wà dìbà. Ùdì ùkwàta mudimu pàdì dìbà kadiyikù, anu mùdìbi bikèngela bwa Ekeleeziya kukwàtaye mudimu pàdì M-w-â-n-à wa Nzambi kàyipù amu. Pàdì Mwànà kàyipù, Bukènkè bwa butàmbe bukese, Ekeleeziya, beena kwitabuuja, mbàdì bàkwàcila Nzambi mudimu ne bàfila Bukènkè pàdì Mwànà kàyipù. Kadi pàdì dìbà dijuuka, kanwèna numòna ngondo kabidi to, bwalu wàbwedi. Kadicyèna kabidi dijinga ne bukènkè bwa ngondo to, bwalu yèyè ùdì ùpeta bwèndè bukènkè anu mu mushindu mulondèle, ùbùpetela ku dìbà. Mpindyewu, anu mùdì mulume ne mukàjèndè, ki mùdì dìbà ne ngondo, Ekeleeziya ne Kilisto.

<sup>35</sup> Mpindyewu tudì tusangana, ne, bintu ebi bìdì mundidimbi wa Kilisto. Mulàmbù wònsò, difesto, ne byònsò bya mu Dipungila Dikulukulu abi, bìvwà bileea Kilisto mu cimfwànyì; anu mùdì mundidimbi wùmwènèka panshi amu. Mpindyewu apa mpààkèngelàbi bwa twètù kupeta mwaba mujaalàme wà dikuukwila, mpa kwalukila mwab'ewu mu Dipungila Dikulukulu mwàkafidiibwàci ne kumòna cìvwà bintu ebi.

<sup>36</sup> Mpindyewu, pàdì mundidimbi wùmwèka panshi, udi mwa kumanya ne mmuntu mulume, muntu mukaji, anyì nyama, anyì nì ncinyì cyònsò cìdìci cìfwànyine kwikala aci, bwalu cìdì cìfila mundidimbi panshi. Nenku pàdì mundidimbi awu ùtamba kwipidika, mundidimbi mwikàle ciibùlòji; ne kakwèna mwa kwikala ciibùlòji kakùyì mubidi wà cintu to. Ki bwa cinyì, pàdì mubidi wa cintu wùtamba kuseemena pamwe ne ciibùlòji, ciibùlòji cìdì ciminyiibwa mu mubidi wà cintu awu. Mundidimbi ne—ne mubidi wà cintu bìdì bìdisanga, nenku ki cìdì cìcìvwijà dìbà adi mubidi wà cintu.

Ne pìikalàbi ne “bintu byònsò bya kale abi,” mùdì Bible mwambe, “mu Dipungila Dikulukulu, bìvwà mindidimbi ya bintu bicìvwavwà,” dìbà adi ki bwa cinyì Kilisto ùvwà mundidimbi wà bintu bicìvwavwà.

<sup>37</sup> Pa nanku tudì mwa kumòna, ku bifwànyikijilu bya Dipungila Dikulukulu, mwaba wàkasungulàYe bwa kutèeka Dìnà Dyèndè, ne bwa...bwa mpindyewu. Mpindyewu, bu

mùdìbì ne mundidìmbì wùdi...wùkòsolola panshi apu, mungàmbì ne, ki ciibùlòjì, ciikàlè cifwànyikijilu, pa nanku twètù, bakuukwidi, tudì pèètù mwa kumòna mindidìmbì ya Dipungila Dikulukulu yijìmina mu mubidi wa cintu wà Dipyadipya.

<sup>38</sup> Mpindyewu, mafesto ònsò, matuku a diikisha, nntentà wa kusambakeena mujimà, mabaya ònsò, byònsò bivwà mu nntentà wa kusambakeena, byònsò abi bivwa bileeja Kilisto mu cimfwànyì. Milambu yònsò, mikenji yònsò, bintu byònsò abi bivwa mu cifwànyikijilu cya Kilisto. Tudì babìlongè, ku musangu ne ku musangu, mu tabernacle emu.

Dibà adi tudì tumona, ku byòbì ebi ne, twitàbàayi yònsò, ekeleeziya, ne dingumba mbishiya ntàntà mule paanyima. Kabyèna mene nansha mu lubilu alu to, nansha kakese. Twitàbàayi yònsò, ekeleeziya yònsò, ne dingumba dyònsò, mbishiya anu menemene pambelu. Kakwènakù mwaba bwàbì byòbì to nansha kakese.

<sup>39</sup> Cintu nansha cimwe kacỳènakù ne cifwànyikijilu mu Dipungila Dikulukulu, anyì kaaba nansha kamwe mu Bible to, cya ekeleeziya, pa kuumusha anu bwobumwe bwa ku makolela bwa ku cibùmbà cya Baabèlè abu. Ki cintu cimwepele cidi cifwànyikijilu cya bwobumwe. Bwalu, civwa cyenza kùdì Nìmèlòdè, muntu wa lwonji wàkapàtuka e kwenzeja ku bukole tuumatunga twa tukese twònsò atu bwa tùbwelè mu mwaba wumwepele mu cibùmbà cinène aci. Civwa ndikuukwila dya butendeleedi, mu bushuwa bwa bwalu, kadi kadiyi dyàngaciibwa ne mushinga mu Dìyi dya Nzambi to. Pa nanku ki mwaba awu wunùdi numòna ntendeleelu wa cyena-mangumba muleejìibwe mu cifwànyikijilu, cibumba cya Baabèlè, mu Dipungila Dikulukulu. Bìdi ne, ntendeleelu ewu cya bushuwa ùvwa ntendeleelu, kadi kàyi ntendeleelu wa Dìyi dya Nzambi nansha.

<sup>40</sup> Nzambi kí mmusungùle bwa kutèeka Dìna Dyèndè mu dingumba nansha dimwe to. Mèmè ndi muswèku Mufundu wa bwalu abu, ní wùdikù. Ndi mumanye ne bàtu bàmba ne Yèyè mmutèèkemù, kadi kí mMutèèkemù to. Yèyè kèna mwa kutèeka Dìna Dyèndè mu myaba yàbùngì to, bwalu Yèyè mmwambe ne mMutèke Dìna Dyèndè mu mwaba wumwepele. Ne, wòwò mwaba wumwepele awu, dyònsò dya ku mangumba etu ndiswe kwamba ne bòbò ki mwaba awu, kadi mbibèngàngàne.

Kadi mMutèeke Dìna Dyèndè penyì?

<sup>41</sup> Mpindyewu, nenku, Yèyè, dyambedi, Dìna Dyèndè nganyì? Nebikengelè bwa (Dìna) kupeta cidi Dìna dya Nzambi kumpala kwa twètù kumòna mwa kupeta ne cidiYe utèeka mu mwine mwaba awu ncinyi.

Mpindyewu, tudì tusangana ne Yèyè ùvwa ne myànzu yàbùngì. Yèyè ùdi ùbìkidiibwa ne... Ùvwa ùbìkidiibwa

ne “Taatu,” aci mmwânzù. Ne Yêyè wàkabiikidiibwa ne “Mwànà,” aci mmwânzù. Wàkabiikidiibwa ne “Nyuma Mwimpè,” aci mmwânzù. Wàkabiikidiibwa ne “Rose wa Shaalònà,” aci mmwânzù. “Mbata wa mu Cibanda,” mwânzù, “Mutooto wà mu Dinda.” “Yehowah-yilè, Yehowah-laafà,” mènà mwandamutekete mashiilàngàne, a mumvwija pabidi, a bupikudi, ne ònsò awu àvwa mmyânzù. Nansha wumwe wà yôyi ayi kawùvwa dìnà to.

Kadi Yêyè ùdi ne Dìnà.

<sup>42</sup> PààkatwilanganàYe ne Mòsà, Kàvwa mwanjì kwikala ne Dìnà to, kadi Wàkambila Mòsà ne: “NDI EWU ÛNDÌ.” Ne patùdi tumona Yesu pa buloba, wàkula mu Ebèlù nshapita mwi6. . . Mfwilaayikù luse, Yone Munsantu nshapita mwi6. Wàkamba ne: “NDI EWU ÛNDÌ.”

Bàkamba ne: “Mona’s, Wèwè udi Muntu wa bidimu kabiyi bipite pa makumi ataanu to, kadi wamba m’Ùdi ‘mumòne Abraham?’”

<sup>43</sup> Yêyè ne: “Kumpala kwa Abraham kwikalayèku, NDI.” Ne “NDI” ki Yêyè awu, kaacipuka kàvwà kàtemà kapyà aku, Dikunji dya Kapyà divwà mu kaacipuka kàvwà kàteema kapyà mu matuku a Mòsà adi, “NDI EWU ÛNDÌ” awu.

<sup>44</sup> Nenku mpindyewu tudi tusangana ne, Yesu wàkamba kabidi ne: “Ndi mulwe mu Dìnà dya Taatù Wanyì, kadi nwènù kanwèna baNgaakidile to.” Dìbà adi, Dìnà dya Taatù’s didi ne cya kwikala Yesu. S’ncya bushuwa. Dìnà dya Taatù n’Yesu, bwalu ki mwàkambà Yesu. “Ndi mwanngàte Dìnà dya Taatù Wanyì. Ndi mulwe mu Dìnà dya Taatù Wanyì, kadi nwènù kanwèna baNgaakidile to.” Nenku, Dìnà Dyèndè’s divwa n’Yesu.

Ne Ngabùdyèlè wàkaMubiikila Yesu, baprofeta bàkaMubiikila Yesu, ne kakùyi mpatà to Yêyè ùvwa Yesu. Kumpala kwa dilediibwa Dyèndè, nansha mene muprofeta wa cijila awu wàkabiikila Dìnà Dyèndè ne *Èmanùwèlè*, mbwena kwamba ne: “Nzambi neetu.” Pashiishe: “Nzambi wàkamwèneshiibwa mu mubidi, bwa kuumusha mpekaatu wa bàà pa buloba,” ne, mu kwenza kwa nanku, Wàkapèèshiibwa Dìnà dya Yesu. Pa nanku, Yesu ki Dìnà adi.

Nenku Dìnà adi dyàkatèèkiibwa mu Muntu; kî ng’ekeleeziya to, kî ndingumba to, kî ntwitabàayi to, kadi m’Muntu! Yêyè wàkasungula bwa kutèeka Dìnà Dyèndè mu Yesu Kilisto. Mpindyewu tudi tujandula ne dìbà adi Yêyè ngudi ulwa mwaba wà Nzambi wà dikuukwila, wunùdi nuMukuukwila.

<sup>45</sup> Kumpala mene kwa Yêyè kulediibwa, Dìnà Dyèndè dyàkabiikidiibwa ne n’Yesu. Divwa dya mushinga mukole mu mushindu wà ne, bàakadipèèsha mamw’Èndè kùdi Mwanjelo Ngabùdyèlè ne, Dìnà Dyèndè divwa mwa kubiikidiibwa ne n’“Yesu, Mwànà wa Nzambi,” civwàYe aci.

<sup>46</sup> Ki twètù bǎwùpecì abu, dǐbà adi. Ki wówò ewu, nkààyaawù. Wówò, wùdi Bwèndè Yèyè nkààyèndè, mwaba wà Nzambi musungula bwa dikuukwila. Mwaba wà Nzambi, musungula. Nzambi mmusungùle bwa kutwilangana ne muntu; kacivwa mmu ekeleeziya kampanda, mu dingumba kampanda, mu twitabàayi kampanda to, kadi mmu Kilisto. Ki mwaba wumwepele wàtwilanganà Nzambi ne muntu, ne mùdiye mwa kukuukwila Nzambi, mmu Kilisto. Ki mwaba wumwepele ngwówò awu. Nansha wèwè mwikàle Méthodiste, Baptiste, Katolike, mwena Mishònyì, cyònsò cyùdi mufwànyine kwikala aci, kùdi mwaba anu wumwepele wùdi mwa kukuukwila Nzambi mu mushindu mujaalàme, mmu Kilisto.

Loomò 8.1, mmwambe ne: “Ki bwa cinyì kakwèna mpindyewu dipiila kùdi aba bàdi mu Kilisto Yesu to, aba bàdi kabàyi bènda bilondèshile mubidi to, kadi bilondèshile Nyuma.” Ki Evanjeeliyo nyawu.

<sup>47</sup> Tudi mwa kupangakana pa twitabàayi. Tudi mwa kupangakana pa malongesha makwàtakaja kùdi bantu. Udi mwa kuya ku ekeleeziya wa ba-Méthodistes, bikèngela wikalè Méthodiste; ku wa ba-Baptistes, Baptiste; ku wa Katolike, mwena Katolike. Kadi paùdi anu ne wabàtijiibu mu Kilisto, ne ulwa cidimba cya Mubidi Wèndè, kakwèna mashìilangana to. Bimanu bya pankaci bìvwà binùtápululà abi mbyupùdiibwe ne nwènù nudi badìshikàmìne, bwalu nudi mu Kilisto Yesu. Nenku udi ukuukwila Nzambi mu Nyuma ne mu Bulelela paùdi mu Kilisto Yesu. Nndongamu wa Nzambi bwebe wèwè bwa kuMukuukwila mu Kilisto Yesu.

<sup>48</sup> Mpindyewu, dingumba dya ekeleeziya nansha dimwe kadyènakù mwa kwamba ne dyòdi ki mwab’awu to, muntu nansha umwe kèna mwa kwamba cyòci aci to. Mmunyì mhuwàdìdingà kwamba mèyi bu nanku awu? Kwenza cintu bu nanku’s nkufwànyine kwikala nyuma wa mufwilakanyi ne Kilisto, kuumushila ku Kilisto; kuumushila ku Yèyè. Kwèna mwa kwenza aci to. Kilisto ki mwaba wumwepele wùdi Nzambi ùtwilangana ne bakuukwidi.

<sup>49</sup> Bàdi bàmba, leelu ewu. Bantu bàtu bàngambila. Muntu mmumbiikile anu abidi àdi panshi aa, mu Beaumont, mu Texas. Kwambaye ne: “Mukalenge Branham, dìnà dyebe dyòdi kadiyi mu mukanda wètù wà mènà wà ekeleeziya to, kwèna mwa kuya mu Dyulu to.” Nudikù bafwànyine kwela meeji ku bwalu abu anyi? Kanwìtabuuji kùdi cintu bu nanku to. Bàdi bòbò bèèla meeji ne bìdi bikèngela wikalè wa mu ekeleeziya kampanda awu bwa cyanàànà kwèna mwa kuya mu Dyulu to. Aci’s ncyà mafi. Kwitabuujà aci, nkwikala mufwilakanyi ne Kilisto. Mèmè ndi ngamba nunku: Wèwè witabuujà nyuma wa nanku awu, udi mujimìne. Ki cimanyinu cìmpè cya ne udi mujimìne ncyòci aci, bwalu nkuumushila ku cidì Nzambi mwenze. Kacya Nzambi kàtukù mutèeke Dinà Dyèndè mu ekeleeziya kampanda to.

Yèyè mmuDitèèke mu Mwan'Èndè, Kilisto Yesu, pàakashààlào Umwe Yèyè ne Mwan'Èndè. Ki mwaba mushùwashùwàlè wa dikuukwila ngwòwò awu. Kakwàkatèèkiibwa bishimikidi bikwabo to, lubwebwe lukwabo to.

Pa Kilisto, Lubwebwe lushindàme, mpàndì  
mwimane;  
Myaba mikwabo yònsò nduntekà.

Mangumba newùpukè ne neàponè, matùnga neàjiminè, kadi Yèyè neàshaalè kashidi. Kakwènakù mungà mwaba wùdi muntu mwa kupeta, bwa kukuukwila Nzambi, wàmwandamunàku Nzambi, mungà mwaba to pa kuumusha mu Kilisto Yesu. Ki mwaba wumwepele, mwaba wumwepele wùdiku Nzambi musungùle bwa kutèekamù Dìnà Dyèndè, ne mwaba wumwepele wùdiYe ùtwilangana ne muntu, bwa kukuukwilaye. Udi mujimine, pùdi witabuuja cingà cintu.

<sup>50</sup> Monaayi, maafesto ònsò mwandamutekete a beena Yuda àvwa ènjiibwa mu mwaba wumwe. Kacya kabàvwakù bènza diifesto *apa* bwa ba-Méthodistes, ne dikwabo *apa* bwa ba-Baptistes, dikwabo *apa* bwa ba-Presbytériens, dikwabo *apa* bwa beena Katolike, ne dikwabo bwa beena Mishònyì nansha. Maafesto ònsò mwandamutekete awu àvwa ènjiibwa mu mwaba wumwe.

<sup>51</sup> S'ncifwànyikijilu cilenga cya dikema kaaba aka's. Tudi bafume ku dilonga Bikondo Mwandamutekete bya Ekeleeziya, nènùleejè ne Nzambi mmulame Bikondo byònsò Mwandamutekete bya Ekeleeziya mu Diyì, bwalu cikondo cyònsò cya ekeleeziya cìvwa cìpàtula citùpà cya Diyì, ne dìbà kanà dyònsò divwàbo bàcipàtula bàvwa bàmòna Bukènke.

Anu mùvwà bantu bàà kumpala bàkajandulà bwa kubatiiza mu Dìnà dya Yesu abu amu. Bàkenza cinyi? Bààkacìvwija dingingumba, ne cyàkafwà anu mwaba awu. Pashiishe Nzambi wàkapàtukamù buludi e kubwelaYe mu muntu mukwabo. Yèyè kààkushààlakù nansha mu umwe wa ku twitabàayi ne mèyi maswika awu to. Kèna ne cya dyenza naaci to. Kùdi Nzambi kakwènakù cintu cinyangakaja nansha. Diyì dya Nzambi ndya cijila, kadiyi disambakaja to. Kilisto ki mpwilààmàmbò wa dikuukwila dya Nzambi. Yèyè ùdi Nzambi.

<sup>52</sup> Maafesto ònsò mwandamutekete àdi ne cya kwenjiibwa anu mu mwaba wumwepele ewu. Kanwena mwa kwenzela diifesto mu mungà mwaba kanà wònsò to. Kadi òwò mwandamutekete awu, mwaba. . .Maafesto mwandamutekete a mu cidimu awu àvwa ne cya kwenjiibwa mu mwaba wumwe. Ki bwa cinyi, bìvwa bikèngela bwa Bikondo Mwandamutekete bya Ekeleeziya abi kufùminabi ku mwaba wumwepele musungùlùke, ùvwa n'Kilisto uvwa wakula mu Bikondo byònsò Mwandamutekete bya Ekeleeziya abi. Ncya bushuwa menemene. Cifwànyikijilu,

cya Bikondo Mwandamutekete bya Ekeleeziya, kadi bôbô kucivwija mangumba.

<sup>53</sup> Mpindyewu tûtangilàayi cifwànyikijilu cikwabo patùcidipu apa, mbwena kwamba ne, cifwànyikijilu cya paasàkà, uvwa ùleeja Yesu mu cimfwànyì awu. Tudi tumòna kaaba aka mulambu wà mashi, ku lufu. Mulambu wà mashi wùvwa mmwaba wùvwà wùleejà Kilisto mu cimfwànyì. Dingumba didikù mwa kuzònzà mashi; nudikù bafwànyine kucinka ekeleeziya kampanda ùzònzà mashi, dingumba dìzònzà mashi anyì? Ncya bushuwa ne to. Bivwa bikèngela mashi, bwa kuzònzawù àfùmina ku mwoyi kampanda. Kabidi, mwoyi, apa Yesu ùdi ùlwa mumwènèkèle patòòke ku mwànà wa mukooko. Mwànà wa mukooko ùvwa cifwànyikijilu cya Kilisto, ne ùvwa ùleeja Kilisto mu cimfwànyì, bwalu Yèyè ùvwa “Mwànà wa mukooko wà Nzambi,” uvwa Yone mulejè kùdì bantu awu, “udi umusha mpekaatu wa bàà pa buloba.” Tudi tupeta Yesu ùlwa mumwènèkèle patòòke, mu Ekèsòdè nshapita wa 12 emu.

<sup>54</sup> Mònaayi, wùvwa mmwaba wumwepele wùvwà lufu kalùyikù mwa kulenga to. Pàkaavwà lufu pabwìpì ne kudikùma pa buloba, bivwa bikèngela bwa kwikalakù mwaba kampanda; bônso bàvwà kabàyi mwinshi mwa cyôci eci bààkafwà. Mwaba anu wumwepele! Mpindyewu, kabivwa byùmvwija ne civwa nnzubu umwepele to; kadi kùvwa mwaba wumwepele, mmwaba wùvwà mwànà wa mukooko mushipiibwe. Mwaba wùvwà mashi a mwànà wa mukooko awu, mwanjelo wa lufu kàvwa mwa kutuutamù to, bwalu wùvwa mmwaba wumwepele wùvwà Nzambi mutèekemù Dìnà Dyèndè. Ne mwànà wa mukooko awu ùvwa mwinyika dìnà musangu awu ku cibangidilu aku ne, mwànà wa mukooko. Mònaayi, ki mwaba wumwepele wùvwàye kàyi mwa kulengakù to.

<sup>55</sup> Nenku mpindyewu mbya mwomumwe leelu. Kùdì mwaba anu wumwepele wùdì lufu lwà nyuma kalùyì mwa kulengakù to, ki Dìyi. Lufu kalwena mwa kulenga Dìyi to, bwalu Didi Dìyi didì ne mwoyi dya Nzambi.

Kadi paùdì welaMù twitàbàayi, Dìyi didì dipàtuka dìshààla pàà nkàayaaDì. NeDìtapulukè anu mùdì màyi àtàpuluka ne maanyì. Kwèna mwa kubisambakaja to. Kì bwa cinyi, nudi numòna's, pàdì twitàbàayi ùbwela mu dingumba, bônso bàdi bàdìtwa ku kulonda kwa twitàbàayi awu; ne Dìyi difwa, ne ditungunuka ne muntu mukwabo ne Dyôdi dyènda divudijiibwa. Dyàngata bukole, pàdìDi diya kuumukila ku dibingishiibwa, dijidiibwa, dibatiiza dya Nyuma Mwimpè, ne dipàtuka dikabwela mu Lutete! Nudi numòna kajila kàdì Nzambi mwendèle anyì? Mwikàle ùtwàla Dìnà Dyèndè, dìbà dyónsò, mushindu wumwewumwe awu too ne kundekeelu, bwalu Yèyè n'Dìyi.

Mònaayi, kaDyèna mwa kufwa nansha. Dìyì dya Mwoyi kadyèna mwa kufwa to.

<sup>56</sup> Mònaayi mùdibi bipwàngàne, mpindyewu. Kabìvwa bikàndika bwa mwanjelo wa lufu kulengaye beena mamanya a mu mitu banene bàà mu Èjiiipitù abu to. Kabìvwa bikàndika bwa kulenga malaba àbò mansantu awu, nzubu yabo ya minene ayi, baapâlò bààbò abu to. Anyi, baakwidi bàà mu ditunga abu, kabìvwa bikàndika bwa mwanjelo awu kubàlengayè to. Cìvwa mwa kulenga nzubu kanà yònsò, mwaba kanà wònsò, muntu kanà yònsò, kadi kacìvwa mwa kulenga mwaba wùvwà mwànà wa mukooko awu to.

Lufu kalwèna mwa kulenga pàdì mwaba mulongolola wà Nzambi wùsanganyiibwa to, ki mu Mwànà wa mukooko amu.

<sup>57</sup> Mònaayi, nansha mene... kabìvwa bikàndika bwa kulengayè Izaleela anyi baakwidi bèndè bàà beena Ebèlù abu to, nenku, anyi nansha dimwe dya ku mangumba àbò. Bònsò bàvwa ne cya kwikala mu mwaba musungula, mulongolola kùdì Nzambi, bwa cyanàànà lufu lùvwa lùtuuta.

<sup>58</sup> Ekeleeziya, kwònsò kùdì, ní udi wa ku cinyi, bwànyì mèmè kabyèna ne cidibi bishintulula to. Kadi, kùdì cintu cimwepele cyùdì ne cya kumanya, bikèngela wìkale mu Kilisto bwa cyanàànà udi mufwe. Kwèna mwa kwikala ne mwoyi pambelu Pèndè Yèyè to. Ekeleeziya wenù mmufwànyine kwikala anu mwimpè, bu citanda; bwobumwe bwenu mbufwànyine kwikala anu bwimpè, bu bantu. Kadi panùdì nuvila Mubidi, Mashi, ne Dìyì dya Yesu Kilisto, nudi bafwè anu mu kasunsa mene munùdì nubivila amu. Mmwaba wà dikuukwila musungula wà Nzambi. Mwómò amu ki mùdì Dìnà Dyèndè, menemene. Mwómò amu ki mùdìYe musungùle bwa kutèeka Dìnà Dyèndè; kì mmu ekeleeziya to, kadi mmu Mwànà, Yesu Kilisto.

<sup>59</sup> Mònaayi, dikubiibwa òvwa disanganyiibwa anu mu mwaba wa disungula Dyèndè Yèyè, mu mwànà Wèndè wa mukooko, ne mu dìnà dya mwànà wa mukooko awu.

<sup>60</sup> Mònaayi, ùvwa mmwànà wa mukooko “mulume,” mulume, kàyi mukaji to. Kacìyi ekeleeziya to, mukaji; kadi Dìnà dya Mulume, kì ndìnà dya mukaji to. Mwaba wùvwàYe mwa kutwilangana ne bantu kawùvwa mu dìnà dya mukaji to, kadi mu Dìnà Dyèndè, Yèyè, Mwànà wa mukooko awu!

<sup>61</sup> Mpindyewu twètù tudi twamba ne: “Ekeleeziya, ekeleeziya munene, wa bukole awu, mmwenze *bikampanda* ne mmwenze *bikansanga*. Mmutwe cyàdì ku bipeepèlè bikolè. Tudi babànde bikole bwa bùngì bwa bantu. Tudi bavulàngàne be. Tudi ekeleeziya wa bukole. Yèyè ùdì cintu cinène.”

Kadi kacya Nzambi kàtukù mwambe cintu bwa mukaji to. Yèyè mmwambe ne: “Yèyè mulume.” “Yèyè mulume,” ki mwaba wà ditwilangana, Mwànà wa mukooko, kì ng’ekeleeziya to. Kì



ndîna dya mukaji to, kadi Dîna Dyèndè. Yèyè kàvwa mutèèke dîna dya mukaji mwaba nansha wumwe to. Úvwa mutèèke Dîna Dyèndè mu “Yèyè”!

Ki bwa cinyi: “Cyònsò citùdi ne cya kwenza, anyi mu dyakula anyi mu cyenzedi, tudi ne cya kucyènza cyònsò mu Dîna dya Yesu Kilisto.” Twètù tusambila, bikèngela túsambilè mu Dîna dya Yesu. Twètù tulòmba cintu, bikèngela tülombè mu Dîna dya Yesu. Twètù twenda, tudi twenda mu Dîna dya Yesu. Twètù tuyiikila, tudi tuyiikila mu Dîna dya Yesu. Twètù tubàtiiza, bikèngela túbatiizè mu Dîna dya Yesu Kilisto. Bwalu: “Cyònsò citùdi twenza mu dyakula anyi mu cyenzedi, tucyènzaàyi mu Dîna dya Yesu Kilisto.”

<sup>62</sup> Muntu wàkangambila musangu kampana, tuyiikila pa bwalu abu, yèyè ne: “Mwaneetu Branham, mukàjàànyi, ncyèna . . .” Yèyè ne: “Mukàjàànyi, dîna dyèndè n’*Kampana*.” Mmwambi, ùdi mwa kwikala musòmbè kaaba aka mpindyewu. Ki yèyè ne: “Mukàjàànyi,” yèyè ne, “ùdi ne dîna dyànyi.” Ndi nganji kwamba anu ne n’*Jones*, bwalu kadivwa Jones to. Yèyè ne: “Mpindyewu, kabyèna bikèngela bwa kwikalaye ùjuuka mu dinda dyònsò, wàmbula lukòmbò wàmba ne: ‘Mpindyewu ndi nkòmba panshi apa mu dîna dya Jones, ne ndi nsukula màlòngò mu dîna dya Jones, ne ndi ngeela biteetela ku bilàmbà mu dîna dya Jones’ to.” Yèyè ne: “Ncyèna ngeela meeji ne bìdi bikèngela anu kwikala kutèèla dîna kampana to nansha kakese.”

Mémè kwamba ne: “Ndi mémè ngeela meeji ne udi ne cya kutèèla.” Ncyà bushuwa.

Ki yèyè ne: “Ee, bwa cinyi? Kabyèna bikèngela bwa kwikalaye ùcyàmba to. Byònsò bidiye wènza’s mmu dîna dya Jones, twamb’eku twamb’eku.”

<sup>63</sup> Mémè ne: “Kadi kwàkapwekakù ne mùsèsèsù ne kumupeta, kwamba ne: ‘Lwàku, Jones’ to. Bìvwa bikèngela, dyambedi, ku mushingà kampana, mushingà wà dibaka, kulwaye ‘Jones.’ Yèyè kàyi mulwe nanku to, nudi basòmbè mu masandi. Ne wèwè mubàtijiibwe mungà mushindu wùdi kawùyì mu Dîna dya Yesu Kilisto to, adi ndibàtiiza dya masandi, didi kadiyi dísanganyiibwa mu Bible to.”

Dìbà adi: “Cinùdi nwenza mu dyakula ne mu cyenzedi, nwènzè cyònsò mu Dîna dya Yesu.” Paanyima pàà aci, cyùdi wenza! Kadi dyambedi, udi mulwe kwikala mu Dîna Dyèndè.

<sup>64</sup> Kùdi bakaji bààbúngì bàà maalù malenga mu citanda emu dilòlòlò edi, bakaji balenga, bàà lulamatu; kadi kùdi Mandamu William Branham umwepele. Yèyè ngudi walukila naanyi kumbelu. Yèyè ngudi mukàjàànyi.

<sup>65</sup> Kudi bantu bàà maalù malenga pa buloba, ekeleziya milenga; kadi kùdi Mandamu Yesu Kilisto umwepele, ne yèyè awu ngudi Yè ùvwila. Ki mwaba wùdi Dîna Dyèndè

disanganyiibwa. Ki mwaba wùdi dikuukwila Dyèndè, mu Yèyè ne mu Yèyè nkààyendè. Aci ncilelèlè. Kaa, eyowa's, mukalenge. Tudi tusangana ne aci ncilelèlè.

<sup>66</sup> Nenku, ki bwa cinyi, twètù: “Cyònsò citùdi twenza mu dyakula anyi mu cyenzedi, tùdi tucyènza mu Dîna dya Yesu Kilisto.”

“Kakwèna dîngà dîna difila mwinshi mwa Dyulu bwa lupàndu to, pa kuumusha Dîna dya Yesu Kilisto.” Byenzedi, nshapita mwi2, ùdi wàmba nanku: “Bwalu bimanyiibwè kunùdi. . .” “Kakwèna dîngà dîna difila mwinshi mwa Dyulu didi muntu ne cya kusùngidiibwakù to, anu mu Dîna dya Yesu Kilisto.” Amen. Ndi ntèkemena ne nudi nucyùmva. Dîna dya Yesu Kilisto, yònsò. . .

Dyulu dya ditàmbe kutùmbuka ndiinyika Dîna Dyèndè. “Fàmiye mujimà mu Dyulu mmwinyika Yesu,” mùdi Bible mwambe, “ne fàmiye mujimà pa buloba mmwinyika Yesu.” Pa nanku ki Dîna disungula dya Nzambi ndyôdi adi ne mwaba wùdiYe muDitèèke. Ki mwaba Wèndè wà dikuukwila ngwôwò awu, mmu Yesu Kilisto. Mpindyewu, tudi bamanyè ne ki mùdibi nanku, kakwèna mûngà mwaba wà dikuukwila to pa kuumusha mu Yèyè.

<sup>67</sup> “Kakwèna dîngà dîna mwinshi mwa Dyulu difila munkaci mwa bantu, didibo ne cya kusùngidiibwakù to.” Dyèndè Yèyè ki Dîna dya Nzambi dya bupikudi. Nzambi ùdi ne dîna didi dibìkidiibwa ne n'Yehowah-yilè, Yehowah-laafà, *Yehowah-yilè*, “Mukalenge ùdi ùkufwila luse ku mpekaatu yebe yònsò.” *Yehowah-laafà*, “Mukalenge ùdi ùkwondopa ku màsaamà èbè ònsò.” Yèyè ùvwa ne myànzu yàbùngi. Kadi Ùdi ne Dîna dimwepele dya bupikudi, didi bwa bukwàbantu, ki Dîna dya “Yesu.” Ki Dîna Dyèndè ndyôdi adi, didiYe musungùle bwa kutèèka. M'MuDitèèke penyì? M'MuDitèèke mu Kilisto.

<sup>68</sup> Mènà makwabo ònsò a maekleeziya awu, twitabàayi, myànzu, ndufu wèwè muèyèmène. Wèwè weyemena ekeleeziya wa ba-Méthodistes bwa kukufikishaye mu Dyulu, udi mujimène. Wèwè weyemena beena Mpenta, bwa ekeleeziya wa beena Mpenta kukufikishaye mu Dyulu, udi mujimène. Ne ba-Baptistes, ba-Luthériens, ba-Presbytériens, beena Katolike, ekeleeziya mukwabo kanà yònsò ewu; wèwè weyemena dîna dyàbò, anyi mwànzu wàyi, anyi twitabàayi wabò, udi mujimène.

Bwalu, kwèna nansha mene mwa kukuukwila to paùdi kùyi mwanji kubwela mu mwaba wà dikuukwila awu. Amen. Ki mwaba wumwepele wùdi Nzambi ùtwilangana ne mukuukwidi, ki mwaba wùdiYe musungùle bwa kutèèkamù Dîna Dyèndè. Mikwabo yònsò ayi, wèwè muyèyèmène, neufwe. Yèyè ùdi kabidi. . .

<sup>69</sup> Mukwabo mundidimbì wà Yesu kaaba aka, ndi mufunde kaaba aka, Mufundù. Kabidi, Yèyè—Yèyè mmuleejè mu

cimfwànyì apa ne: “Yèyè ùdi ne cya kwikala kàyi ne kalèma to.” Mwaba wùdiYe ùtèeka Dìnà Dyèndè, mwànà wa mukooko ewu ùdi ne cya kwikala kàyi ne kalèma to.

Mpindyewu, nku dingumba kaayi anyi ndongolwelu kaayi kùdiku mwa kulamika ciine eci; ekeleeziya kaayi, Katolike anyi, Mishòònyì anyi, wa beena Yuda anyi, anyi yònsò udikù awu? Nku ndongolewelu kaayi, nku dingumba kaayi, kùdiku mwa kulamika ciine aci ne, “kàyi kalèma pambidi”? Yònsò’s mmiimànshìibwe, ne mibèngìibwe!

Kadi kùdi mwaba! Aleluuyah! Mwaba awu mmu Yesu Kilisto. Kakwèna kalèma pambidi Pèndè to. Kakwèna kadyuwù mu Yèyè to.

Kwèna mwa kulamika cyòci eci to. Bantu bònsò bàdi bàteetà kwenza nanku aba, bàdi bàmba mùdi wabò ekeleeziya kàyi ne kalèma anyi *bikampanda* byònsò ebi. S’mbakooyike, bashipi bàà Dìyi, banangi, bafwè cipùùkà, beena Laodikiya, twitabàayi, kadi kì m’Bulelèlè nansha. Kadi nansha Pìlaatù mwine, mwena lukuna Wendè awu, s’wàkamba ne: “Ncyèna mpeta kalèma mu Yèyè to.” Mwena lukuna Wendè Sungasunga’s wàkajaadika ne kakùvwa kalèma mu Yèyè. Kwèna mwa kuMulamikakù mpekaatu nansha wa bìshi to.

<sup>70</sup> Yèyè wàkambila bakwidi bàà mu dituku Dyèndè abu ne: “Nganyì wa kunùdi udikù mwa kuMpìisha bwa mpekaatu? Nganyì udikù mwa kuNdeeja ne Mèmè ndi ngènzàmpèkààtù?”

Ngambìlaayaaku ekeleeziya umwepele udikù mwa kwamba ne kacya bòbò kabàtùkù benzè cintu kampanda cya cibì. Bwa kwamba menemene, nansha umwe wa kùdiyi kènàku to, mbikolè be bwa kumupeta, udi kàyikù mushebèyàngàne ne mwenzè byònsò bìdi mu kabala-matùku ebi, s’mbikolè be. Cibì bàdìbìikila... Pa nanku kì mmwaba wà Nzambi wà ditwilangana wà dikuukwila nansha, mu twitabàayi anyi dingumba nansha dimwe.

<sup>71</sup> Balunda bàànyì, ncyèna muswe kutàpangana ku mwoyi to, kadi ndi mwambule bujitu bwa Mukenji kampanda, ne, mwine Mukenji awu ngwà ne: “Pàtukàayi mu cibwejàkàjì eci!” Kadi mèmè mukulòmbe bwa kupàtuka, kúngààyà neebe kì kwèpì? Kùndi mufwànyine kuya neebe kì ku Branham Tabernacle anyi? S’kùdi bilèma bùngì anu bu bya ku mikwabo myaba kanà yònsò ayi.

Kadi kùdi mwaba wumwepele kùndi mwa kuya neebe, kùdi mu dikubiibwa ne mulamiibwe ku lufu, mmu Yesu Kilisto, mwaba wà dikuukwila wà Nzambi. Ki mwaba wùndi nnùleeja dilòòlò edi, ngwòwù awu, wùdi Nzambi mutèekemù Dìnà Dyèndè. Mwaba wàkalayàYe ne Yèyè ùvwa mwa kutwilangana ne muntu yònsò udi ulwamù awu, Yèyè ùvwa mwa kukuukwila pamwe nendè ne kwenza nendè diifesto, kì mu Kilisto amu; kì mmu ekeleeziya, kì mmu tabernacle nansha umwe to.

Kadi, mu Kilisto, Yêyè ngudi Ntentà wa kusambakeena wa Nzambi. Yêyè ngudi mwaba wâkabwelà Nzambi, Yêyè mwine, ne kusòmbela Yèmu. “Ewu m’Mwan’Ànyì munanga ûNdì nsànkila bwa kusòmbela munda Mwèndè.” Mwômò amu ki mùdì Nzambi mwele ntentà musòmbèle, mulwe ne Dîna Dyèndè ne muDitèèkepù, Yesu Kilisto. Ki bwa cinyì, Dîna Dyèndè dyàkatèèkiibwa mu Muntu, Mwan’Èndè, Yesu Kilisto, mùdìYe mwele ntentà musòmbèle Yêyè mwine, ne mu yêyè Ntentà wa kusambakeena awu.

Pààbì, mu cifwànyikijilu, Yèlusàlèrà wa kale awu, maafesto a kale awu, ntempeli wa kale awu, bìvwa ncifwànyikijilu; pààkabwelà mwishi, dituku dyàkabwelà mushèètè, wà cipungidi, ne kusòmbelawù muntwamu adi, ki Dîyì dya Nzambi kuumvwikilamu.

Nenku Dîyì dya Nzambi dyàkuumvwika, dibwela mu Ntentà wa kusambakeena awu, Yesu Kilisto; mùdìbi ne, aci Cikulukulu (cya mubidi) civwa cifwànyikijilu ne mundidimbì wà Cipyacipyà. Nenku pààkabwelàYe mu Kilisto, Wàkamba ne: “Ewu m’Mwan’Ànyì Munanga, Mwena munda mùNdì nsànkila bwa kusòmbela. Nenku Nènsungulè mwaba, wùNgààtèkà Dîna Dyànyì, wùNgààtwilanganà ne muntu, ne wùNgààkuukwilà.” Nzambi ngwàkasungula mwaba awu; kamùyi mu dingumba dya ekeleeziya nansha dimwe to, kadi mu Yesu Kilisto. Eyowa’s, mukalenge.

<sup>72</sup> Yêyè kabidi ùdi ne cya kwikala “kàyi ne kalèrà,” mûngàmbì amu. Dingumba nansha dimwe kadyènakù mwa kwamba ne didi nanku to. Bòbò bàmba; bàdi mufwilakanyi ne Kilisto.

<sup>73</sup> Mpindyewu tudi tusangana kaaba aka, monaayi cyakabidi mundidimbì Wèndè. Bìvwa bikèngela bwa mwànà wa—wa mukooko awu kulamiibwaye. Mpindyewu, eci cidi cìsanganyibwa mu Ekèsòòdè 12, panwikalà nucifùnda, Ekèsòòdè 12.3 too ne ku 6. Mwànà wa mukooko awu ùvwa ne cya kulamiibwa matuku anaayi, bwa kuteeciibwaye, kumòna ní ùcivwa mukùmjànyine ku mulambu awu. Úvwa ne cya kwangaciibwa, kukenkeciibwa misangu ne misangu, matuku anaayi, bwa kumòna ní ùvwa ne kalèrà pambidi, kumòna ní ùdi ne dísamà mu yêyè, kumòna ní kùdi cintu kaciyi cìmpè kùdi mwànà wa mukooko awu. Úvwa ne cya kulamiibwa matuku anaayi.

<sup>74</sup> Mpindyewu mònayì. Bamwe bàà kunùdi mbafwànyine kwikala beelè meeji ndambu ne yêyè, bàvwa bamushebèye mu matuku a ngondo dikumi ne anaayi. Kadi, nudi bavùlùke ne, bààkangata mwànà wa mukooko awu mu dituku dya dikumi dya ngondo, ne kumushebeya mu dituku dya dikumi ne diinâyì dya ngondo awu, nwamonu’s, ùvwa ùlamiibwa matuku anaayi.

<sup>75</sup> Mpindyewu, Yesu, Dîna dya Nzambi adi, Mwànà wa mukooko, wàkabwela mu Yèlusàlèrà ne kààkamùpàtukakù

kabidi to too ne paanyima pàà lufu, dijiikiibwa, ne dibìikà Dyèndè dya ku lufu. Wàkalamiibwa kùdi badyudi matuku anaayi a muunya ne a bufuku. Mwine mwàkafwànyikijìibwà Mwànà wa mukooko awu mushindu mupwàngàne's wè, mulama matuku anaayi. Ki díbà adi dyàkambà Pilaatù ne: "Ncyèna mpeta cilèmà nansha cimwe mu Yèyè to."

<sup>76</sup> Mundidìmbì mukwabo Wèndè: mufùbà nansha wumwe kawùvwa mwa kucìbudiibwa mu Yèyè to, cìvwa cipwàngàne anu menemene, pàvwàbo kabàyi mwa kucìbula mufùbà to. Mu kushebeya kwa mulàmbù awu, kabàvwa mwa kucìbula mufùbà to. Bòbò bawùcìbùle, wùvwa wùbèngiibwa. Nenu bàkaavwa beelè nsandu muulu bwa kucìbulabò mifùbà mu mikolo ya Kilisto, pààkambàbo ne: "Ùkaadi mumane kufwa." Kutùbulabò lubadi Lwèndè ne kusanganabò Mashi ne màyi.

<sup>77</sup> Mònaayi kabidi cintu cinène kaaba aka. Ncyèna mufwànyine kucitùpika nansha, bwalu Yèyè ùvwa muleejìibwe mu milàmbù, mulàmbù wà bukula.

Ndi mvùluka musangu kampana pàvwabo ne cilongelu, mu Bible, cibìikidiibwa ne ncilongelu cya baprofeta, ne cìvwa ncilongelu anu cyetu cya bushuwa eci. Ne tudi tusangana ne Eliyà wàkaya ku cyòci cilongelu aci dîngà dituku, ne bàakamba ne: "Tudi. . ." Kumusèngeleelabò bwa kuumukaye, bàmba ne: "Paùdi muneemu, maalu àdi àtàmba kwikala malulàme." Pa nanku bàvwa baswe bwa yèyè kuumuka.

Ki kuya kamukèbelabò cyàkudyà. Ki musùmbà wà baakwidi kupàtukawù, anyì wà baprofeta, bwa kwaka ndambu wa nkùnde, bwa kumwenzelabò cyàkudyà. Nenu pààkayàbo, bàakabyàka mushikì munene cilùlù tètè; kadi pààkaalukilàbo, bìvwa mbilòwalowa bya cisuku, bìvwa mulùngù abi, ne kubyèlabò mu lwesu. Ki ngeesu kubangayi kusàba, ki bòbò, muntu kampana, kwambaye ne: "Bakwetu wanyì, mùdi lufu mu lwesu. Mpindyewu katwèna nansha mwa kudya to."

Ki Eliyà kwambaye ne: "Ntwàdilaayi dyanza dya bukula." Ki kwangataye bukula e kubwèlayè mu lwesu amu, ne kwambaye ne: "Dyàyì. Lwesu lwòndòpiibù."

<sup>78</sup> Mulàmbù wà bukula awu wùvwa n'Kilisto. Lutete lwònsò lùvwa ne cya kuvwijìibwa lwa mwomumwe, ne kaalusèkà kònsò kàà bukula bìvwa bìkèngela kwikalaku kàà mwomumwe, bwa mulàmbù wà bukula awu. Bìleeja ne Yèyè mMwondopi. Yèyè ùdi wàngata kaaba kaa mukwabo, ne ùmusha lufu, ne ùtèekapù Mwoyi; ku mikenji yibidi ayi. Aleluuyah! Kwònsò kùdi lufu, pa mwaba; pàdi Kilisto ùbwela, Mwoyi wùdi wùbwela. Yèyè udi umwèumwè awu makeelela, leelu, too ne kashidi. Nè mwaba wùvwa lufu awu, kwàkalwa Mwoyi, bwalu Kilisto wàkabwejiibwamù, mulàmbù wà bukula.

<sup>79</sup> Ndileesònà dinene kaayi didi bintu ebi bifwànyine kwikala bu twètù mwa kwangata díbà dya kubisùnsula! Mpindyewu

mònaayi, dìyì nansha dimwe dya mindidimbì ayi kadyèna dipangilakù to. Kacya dìyì nansha dimwe kaditukù dipangile to, dya mundidimbì. Byònsò mbileejiibwe mu cifwànyikijilu mu bupwàngàne.

Yèyè ngudi mwaba wa dikukwila musungula wà Nzambi, ne Dìna dya Nzambi ndiMupèèsha Yèyè. Yèyè ngudi mwaba wà dikuukwila wà Nzambi, ne Dìna dya Nzambi ndiMupèèsha Yèyè. Yèyè ùdi Dìyì dya Nzambi, ne Yèyè ùdi Dìna dya Nzambi. Yèyè ùdi Dìyì dya Nzambi ne Dìna dya Nzambi byònsò bibidi. “Yèyè ùvwa Dìyì divwijiiibwe mubidi.” Yèyè ùvwa Dìyì dya Nzambi, Mwàna wa mukooko wa Nzambi, Dìna dya Nzambi, ne ùvwa Nzambi. Ki ciwàYe, mwaba musungula ne wumwepele wa dikuukwila wà Nzambi.

<sup>80</sup> Ne Nzambi ùdi ùbènga mwaba mukwabo wònsò pa kuumusha mu Yesu Kilisto; kwèna mwa kuMukuukwila mwaba wònsò nàka to. Yèyè mmwambe ne: “Bàdi baNkuukwila mu cijengu, bàlongesha mèyi matùma a bantu bu Dilongesha.” Leelu tуди ne twitabàayi, mèyi maswika, ne bikwabo byònsò, bidì bìlongeshà ne *cikampanda* ki njila ne *cikansanga* ki njila.

Ki Yesu kwambaYe ne: “Mémè ki Njila, Bulelela, ne Mwoyi, ne muntu nansha umwe kèna mwa kulwa kùdi Nzambi kàyi mupicile kùNdi to.” Mu ngaakwilù mukwabo ne: “Mémè ki Ciibi cya ku cikùmbi cya mikooko. Bàà pambelu bònsò abu mbìvi.” Yèyè ki cibwelelu cimwepele. Yèyè ki Ciibi. Yèyè ki Njila, Bulelela, ne Mwoyi, byònsò bidìku abi; cibweledi cimwepele, mwaba wumwepele, dikuukwila dimwepele, Dìna dimwepele.

Byònsò mbiswikila ku Yesu Kilisto. Dipungila Dikulukulu dijimà ndiswikila kùdiYe. Dipungila Dipyadìpyà ndiswikila kùdiYe. Ne Ekeleeziya leelu ewu mmuswikila kùdiYe, kùdi Dìyì dya dìyì Dyènde ditùma. Kakwèna mùngà mwaba, anyì dīngà Dìna, anyì kukwabo kwònsò, kùkaadìku Nzambi mulaye bwa kutwilanganaYe ne muntu to; anu mu Yesu Kilisto, mwaba Wèndè musungula wà dikuukwila.

<sup>81</sup> Mònaayi, Nzambi mmulaye bwa kutwilangana ne bakuukwidi Bèndè anu mu mwaba wumwepele ewu, ne wòwò awu ngwà disungula Dyèndè Yèyè mwine; kī ngwà disungula dyetu twètù to, kī ngwà ku meeji etu twètù to; kadi ngwà ku meeji Èndè Yèyè, disungula Dyèndè Yèyè. Nenku awu ngùdi mufwànyine kwikala mwaba wùdiYe mutèèke Dìna Dyèndè, wùdiYe musungùle. Pa nanku tуди tujandula ne tуди tusangana mwaba wùvwa Dìna Dyèndè, wùdiYe musungùle, ku disungula Dyèndè Yèyè mwine.

<sup>82</sup> Mpindyewu utwàpeci mwaba wùdiYe mutèèke Dìna Dyèndè, mbwena kwamba ne, mu Kilisto Yesu, ne kakwèna mùngà mwaba, anyì dīngà dīna to, nudi batwishiibwe bwa aci anyì? Ambàayi ne: “Amen.” [Disangisha didi dyamba ne: “Amen.”—Muf.] Mpindyewu, bwalu bùdi ne, twètù bapete pàdi

mwaba. . . Mwaba wà dikuukwila kî mmwitàbiiibwe nî mpenyi pònsò to, anu mu Kilisto.

Udi mwa kunyingalala, udi mwa kwenza nanku, kadi kwênà anu mwanji kwikala ukuukwila to. Udi munkaci mwa kulòmba luse. Peetèlò wàkamba. . .

Mu Dituku dya Mpenta, pààkabàmònàbo bònsò bààkula mu myakulu, ne bimanyinu binène ne maalu a kukema byènzeka, bààkabanga kuseka, ekeleeziya ùseka's, bàmba ne: "Bantu aba mbùle tètè ne mvinyo mupyamùpyà. Bàdi bènza maalu bu bantu bakwàcike maalà. Bòbò. . ." Virgo Mariya, bòbò bònsò, bàvwa kaaba kamwe, bantu lukama ne makumi abidi. Nenku bàvwa bàtetuka byenzè bu bantu bakwàcike maalà, ne bààkula mu myakulu, ne benza bintu bya lukutukutu. Kwambabò ne: "Bantu aba mbùle tètè ne mvinyo mupyamùpyà."

<sup>83</sup> Kadi Peetèlò, mwimane mwaba awu, kwambaye ne: "Balùmyànà ne bânà beetu, bantu aba kî mbùle tètè ne mvinyo mupyamùpyà to, bwalu dîbà edi dicidi anu pa citeema wa dinda. Kadi eci ncyàkambàbo kùdì muprofeta Yowèlà ne: 'Ne nebyènzekè ku matuku a ndekeelu, mùdì Nzambi wàmba, ne Mèmè nèmpongololè Nyuma Wanyi pa mubidi wònsò; bânà beenu balela balume ne bakaji nebámbe biprofeta; pa basadidi Bàànyi balume ne bakaji Mèmè nèmpongololè Nyuma Wanyi. Nèndeejè bimanyinu muulu mu maulu, ne pa buloba; kapyà, makunji a kapyà, mabungi a mwìshì. Nebyènzekè ne, kumpala kwa Dituku dinene ne dîdì dikwacishà bwòwà dya Mukalenge kulwadì, ewu yònsò wasòka Dîná dya Mukalenge neàsungidiibwe.'"

<sup>84</sup> Pààkumvwàbo nanku, bààkalengiibwa bikolè mu myoyi yàbò, ne bààkamba ne: "Balùmyànà ne bânà beetu, citùdì mwa kwenza ncinyi?"

<sup>85</sup> Peetèlò kwambaye ne: "Nyingàlàlaayi, yònsò wa kunùdì, ne nùbatijiiibwè mu Dîná dya Yesu Kilisto bwa dilekelediibwa dya mpekaatu yenu, nenku nenùpetè kupà kwa Nyuma Mwîmpè. Bwalu mulyi wùdì kùdì nkòngò yònsò yìcilwalwà." Mpindyewu's tudi tusangana nanku.

<sup>86</sup> Mpindyewu tudi baswe kupeta mutùdì tubwela *munda* Mwèndè. Tudi tubwela mu mwaba wà dikuukwila ewu munyi? Kolintò wa Kumpala 12 ùdì ùkòsa bwalu, bwalu: "Ku Nyuma umwe!" Kî nku ekeleeziya umwe to, kî nku twitabàayi umwe to, kî nku mpaasàtà umwe to, kî nku mwepiskopo umwe to, kî nku nsaserdose umwe to. Kadi: "Ku Nyuma Mwîmpè umwe nkutùdì bònsò babàtijiibwe mu Mubidi wumwe," wùdì Mubidi wà Yesu Kilisto, ne baabanyanganyi bàà dipà dyònsò didì disanganyiibwà mu wòwò Mubidi awu. Eyowa's, mukalenge! Kabiya bya dikadilamika to, bya dyambulula dya twitabàayi, bya dipwidija, dilekelela, dilabulangana dya ku cyanza, anyi nî ncinyi cikwabo to. Kadi, ku Dilediibwa nkutùdì babàtijiibwe

mu Mubidi wa Yesu Kilisto! Amen. “Ku Nyuma Mwîmpè umwe nkutùdi bônso babàtìjìibwe mu Mubidi wumwe.”

<sup>87</sup> Nenku Mubidi awu ncinyi? “Ku cibangidilu kwàkadi Dîyi, ne Dîyi dyàkadi ne Nzambi, ne Dîyi dyàkadi Nzambi. Ne Dîyi dyàkavwijiibwa mubidi ne dyàkasòmbela munkaci mwetu.” Mmunyi mutùdiku mwa kwikala mu Mubidi awu kadi kuvila Dîyi dimwepele dyàWù, anyi kuDitèèka kule mu mwaba mukwabo kampana ne kaDîyi nansha mu Mubidi awu? Mmunyi mutùdiku mwa kwenza nanku? Mwaba musungula wà Nzambi!

<sup>88</sup> Mònaayi, ne paùdi mubàtìjìibwe bulelela munda Mwèndè, cileeeji cilelèla ncyà ne wèwè udi uMwitabuujà, Dîyi.

Mmunyi mùdiku mwa kwikala citùpà Cyèndè kadi kuMuvila? Mmunyi mùndiku mwa kuvila ne cyanza cyànyi ne kî ncyanza cyànyi? Kwòkò... Mémè mucivilè, kùdi cintu cipampàlámùke mu byeledi byànyi bya meeji. Kadi ndi mwa kuvila munyi's? Kwòkò cintu cipampàlámùke mu byeledi byànyi bya meeji, pàndi mvila ne kî ncyanza cyànyi, mvila ne kî ndikàsà dyànyi, kùdi cintu cipampàlámùke mu nyuma wa mwena kwitabuujà udi uvila Dîyi kanà dyònsò dikaadiku Nzambi mwambe ne mulaye adi. Kùdi cintu cipampàlámùke mu nyuma wa mwena kwitabuujà wa ku dîna awu.

<sup>89</sup> Kwéna mwa kuvila dileeta nansha dimwe dya ku Yèyè to, bwalu wèwè ukàadi mulwe citùpà cya cintu cimwecimwe aci. Wèwè udi citùpà cya ku Yèyè bwalu udi mubàtìjìibwe munda Mwèndè; ku, Nyuma Mwîmpè mmukubweje mu Mubidi wà Yesu Kilisto. Cintu kaayi bulengaci's wè!

<sup>90</sup> Nzambi ùvwa ne mwaba musungùlùke wùvwàYe ùtwilangana—wùvwàYe ùtwilangana ne Abraham, ne mwaba awu ngùvwà Abraham ùkuukwila. Mu Cipungidi cijimà amu!

Nenku Dîyi Dyèndè dilaya nedyùmvwijiibwe munda mwebe, kùdiYe. Nuumvù aci anyi? Dîyi dyàkalayàYe bwa kuuja mu dituku dyùdi wèwè ne mwoyi edi: wèwè newikalè mukanda mufùndilangana wa Nzambi, wùdìbo bàbala kùdi bantu bônso. Kî ncyùdi wèwè ulàka mukana wamba aci to, kadi cidi Nzambi wènzela kùdi wèwè aci, necyàkulè ne dîyi dikole kutàmba nî ncinyi cyònsò cyùdi wèwè mufwànyine kwamba aci. Nzambi mmwambe ne: “Bimanyinu ebi nebifilè aba bàdi bìitabuujà.” Aci's cidi cyàkwila kùdi wèwè.

<sup>91</sup> Yèyè wàkaakula bwa eci cikondo, bwa cìvwà mwa kwikalakù mpindyewu aci. Bìkèngela bwa beena kwitabuujà bàà eci cikondo bìitabuujè Eci, cidiYe mulaye leelu aci. Bya mwomumwe anu ne mwàkakèngelàbi bwa kubwelabò mu bwâtù, bwa kusùngidiibwabò amu; kupàtuka mu Èjiipitù bwa kusùngidiibwabò; bìkèngela bwa kubwelabò mu Kilisto, bwa kusùngidiibwabò mpindyewu, kubwela mu Mukenji-Dîyi, wà ne Yèyè udi umwèumwè awu makeelela, leelu, too ne kashidi.



92 Udi ubwelaMù bìshi? Ku dibatiiza! Dibatiiza kaayi, dya mu mâyi anyi? Ku Nyuma Mwimpè! “Ku Nyuma umwe, tudi bônso babàtìijìbwe mu Mubidi wumwe ewu.”

93 Ne Diyì Dyèndè dilaya, Yèyè kààkwikala... Kabyàkukèngediibwa bwa wèwè kuDyùmvwija nansha. Yèyè ngwaDyùmvwijila ku wèwè; cyùdi wenza, cyàkalayàYe bwa kwenza aci. Ekeleeziya udi uMulonda awu neikalè mufwànàngàne Nèndè bikolè mu mushindu wà ne bantu nebàmanyè.

Tàngilàayi Peetèlò ne Yone pààkabèlābo lukonko pa bivwà bitàngilā dyondopiibwa dya muntu kampanda ku ciibi civwà cibìikidiibwà ne n’Cilenga apu. Mbambe ne: “Bààkajingulula,” baakwidi abu’s, “ne bàvwa bapangi ne kabāyi bamanyè mukanda,” kadi bààkamòna ne bààkadi ne Yesu. Bwalu, (cinyi?) bàvwa benza bintu byàkenzàYe Yèyè.

94 Ûvwa ne cya kwikala mudifile ku maalu a Taatù. Ne leelu bìdi ne cya kwikala bya mwomumwe.

95 Mpindyewu, vùlukàayi ne, Yèyè ùdi umwèumwè awu makeelela, leelu, too ne kashidi; bwalu Nzambi ùdi ùtwilangana neebe munda Mwèndè, mwaba wumwepele wùdiku; bwalu ki wùdiYe musungùle bwa kutèèkamù Dìna Dyèndè, mu Yesu. “Yesu” ki Dìna dya Nzambi. Vùlukàayi ne, Taatù, Mwànà, Nyuma Mwimpè, mmyànzù ya Dìna adi “Yesu Kilisto.”

96 Pàdi Maatàayi mwambe ne: “Ndààyaaku, nùlongeshè matunga ònsò, nubàbatiiza mu Dìna dya Taatù, dya Mwànà, ne dya Nyuma Mwimpè.”

Mushindu mwine wùdibo bàcyūmvwijè bibi leelu ewu’s wè, bàmba ne: “Mu dìnà dya Taatù, dìnà dya Mwànà, dìnà dya Nyuma Mwimpè.” Kacyèna nanshà cifùnda nanku to. Cidi ne: “Mu Dìnà,” ku bumwe, “dya Taatù, Mwànà, Nyuma Mwimpè.” *Taatù* kî ndîna to, *Mwànà* kî ndîna to, *Nyuma Mwimpè* kî ndîna to; mmwànzù.

Pààkapitā matuku dikumi, Peetèlò kujuukaye e kwamba ne: “Nyingalālaayi, yònsò wa kunùdi, nùbatiijìibwè mu Dìna dya Yesu Kilisto.” Dìbā adi yèyè wàkenza civwàYe mumwambile ne kènji anyi? Yèyè wàkenza civwàYe mumwambile bwa kwenza. Dìna dya Taatù, Mwànà ne Nyuma Mwimpè didi “Mukalenge Yesu Kilisto.” Muntu yònsò mu Dipungila Dipyadìpyà wàkabàtìijìibwa mu Dìna dya Mukalenge Yesu Kilisto.

97 Kacya muntu nansha umwe mu Bible kààkabàtìijìibwakù mu myànzù ya Taatù, Mwànà, Nyuma Mwimpè ayi to. Aci kacyàkiikalakù to anu too ne pààkatèèkiibwà twìtabàayi wa Nicée awu ku Nicée, ku Loomò. Dìvwa ndiyi ditùma dya ekeleeziya wa Katolike, disangana, dishìndika ne ncintu cimwecimwe aci, mu kateshismu. Ndi naaci, ncyā bushuwa,

*Malelela à Diitabuujà Dyètù*, ne bikwabo, bwa ne kakùyi mpatà to ntwitabàayi wa Katolike wa cyena Loomò. Nebàkwambile mudici kaciyi mu Bible to; kadi bàdi bàmba mùdibo bôbò ne bukòokeshi bwa kushintulula Mèyi awu, bôbò baswe, bwa bukòokeshi bwa paapà. Mémè ndi mpangakana naabo.

Yesu Kilisto ùdi umwèumwè awu makeelela, leelu, too ne kashidi. “Ne ewu yònsò ùmushila Dìyi dimwe ku Bible ewu,” mùdi Yesu mwambe, “anyi wasàkidilaMù dìyi dimwe, citùpà cyèndè necyùmushiibwè ku Mukanda wà Mwoyi.” Dìyi dimwe; kī ncyambilu, anyi kasaka to, kadi Dìyi! “Ewu yònsò ùmushila Dìyi dimwe. . .”

<sup>98</sup> Ku cibangidilu, Nzambi wàkakùbila bantu Bèndè mu bimanu bya Dìyi Dyèndè. Dìyi dimwepele, dyumvwija bibi, dyàkakèba lufu lwònsò, disaamà dyònsò dya mwoyi, tunyinganyinga twònsò etu. Evà, yèyè kàakatùpa ku cyambilu cijimà to; wàkatùpa ku Dìyi dimwepele. Pàakalwà Yesu munkaci mwa Mukanda awu. . . Kwàka kùvwa nkuntwàdijilu kwa Mukanda.

Pàakalwà Yesu munkaci mwa Mukanda, Wàkamba cinyi? “Mbifùnda ne muntu kàakwikala ne mwoyi ku dyàmpà nkàayaadi to, kadi ku Dìyi dyònsò didi dipàtukà mukana mwa Nzambi.”

Kundekeelu kwa Mukanda, Bwàkabuulwibwà nshapita wa 22, mvensa wa 18, citùpà cya kundekeelu menemene kwa Bible aci, Yesu Yèyè mwine ngudi wakula awu, wamba ne: “Ndi njaadika ne muntu yèyè muumùshe Dìyi dimwe ku Mukanda ewu, anyi musàkidileKù dìyi dimwe, cyèndè citùpà necyùmushiibwè ku Mukanda wà Mwoyi,” bwalu yèyè mmuprofeta wa mashimi ne mmumvwije bantu bibi, ne mashi àbò neàlombiibwè ku cyanza cyèndè, bwa dyenza dya nanku.

<sup>99</sup> Tudi ne cya kulama mwaba umwepele wà dikuukwila awu, mbwena kwamba ne, Yesu Kilisto Dìyi, umwèumwè awu makeelela, leelu, too ne kashidi. Amen. Eyo. Vùlukàayi ne, kakwènakù mukwabo mwaba wà ditwilangana bwa kukuukwila to, mwaba nansha wumwe. Nzambi ngudi muWùsungùle.

<sup>100</sup> Yone, kale menemene wàwa pa dinungu dya pankaci pàa Dipungila Dipyadìpyà ne Dikulukulu. Tèelejàayi ne ntema mpindyewu. Mònaayi ne ntema yònsò. Yone, mukanku munene awu, kulwaye wènda ùpaapala ùfùmina mu cipèèlà dituku kampanda, ne mapwàpwà èndè manene awu mabaalula. Kwikilayè ku mwelelu wà musulu wà Yadènè, muprofeta-mukanku munene wàkeela cilamba pankaci pàa Dipungila Dikulukulu ne Dipyadìpyà awu, ne kubàikilayè ku dyabalume ne ku dyabakaji. Úvwa ùbìikila dituku dya kanyinganyinga.

Kwàkapàtukà Bafaalèsà ne Basadokà; kwambaye ne: “Kanùbangi kudyàmbidila mundamunda ne: ‘Twètù tudi ne Abraham bu taatù wetù’ to, bwalu ndi ntwàmbila ne ku mabwe

aa Nzambi ùdi ne bukole bwa kujuudila Abraham bânà.” Kaa, ekelekele!

Pààkabangàye kwamba Evanjeeliyo wendè patòòke, wàmba ne: “Nkwimane Kampanda munkaci mwenu amu, Unùdi kanùyì bamanyè to. Ncyèna mwanjì kuMumanyishisha to, kadi nèmMumanyè pààlwàYe. Ncyèna mukùmbànyìne kusùùlula nshinga wa cisàbaatà Cyèndè to. Kadi Yèyè ngwanùbàtiiza ne Nyuma Mwimpè ne Kapya. Ne cipeepudi Cyèndè cidi mu cyanza Cyèndè; Yèyè neàkezulè cishiipwilu Cyèndè cyònsò nkòòng, ne Neòshè bisòta ne Kapya kàdibo kabàyi mwa kujìmakù to.”

<sup>101</sup> Mukanku munene wà Evanjeeliyo awu mwikile mwaba awu, pàvwàwu wùsàma ne dīyì dikole wèla mifuunu yèndè minene apu. Ki bukooya kupàtukabù, anyì Helòòdè, mukalenge wa bumfumu bwalàbàle mwine musangu awu, mwambi wa mèyi a patòòke, musèle mukaji wa mwanaabo. Kadi nudikù nwènù mwa kudifwànyikijila mukanku munene wà Evanjeeliyo awu mwikile mwaba awu kadi wùshààla mupùwe pa bwalu abu anyì?

Bamwe bàà kùdibo kwambabò ne: “Wàmanya kùlu kuyiisha pa dibaka ne difwà dya dibaka, Yone, bwalu Helòòdè nyawu musòmbè pààpa.”

<sup>102</sup> Kuyaye tàmakàtàmakà too ne mwìsù mwèndè e kwambaye ne: “Bilondèshile mikenji kì mbyanyìshìibwe bwa wèwè kwikala ne mukaji awu nansha.” Cya bushuwa!

Aci, yèyè, cìvwa ncinyì aci? Yèyè ùvwa mukanku mufùmìne mu cipèèlà awu. Yèyè kàvwa mulongeshila mu diciìnyìshìibwa ne mikànu ya bantu, bàà dingumba kampanda nansha. Kadi yèyè ùvwa mulongeshila mu bukole bwa Nzambi wa Bukole bwònsò, bwa kumanya cìvwa mwa kwikalakù aci. Yèyè ùvwa mumanye dimanyìshìibwa dya Maasiyà.

Aleluuyah! Mwaku awu wùdi wumvwija ne: “Tùmbishàayi Nzambi wetù!” Kanùumvu bwòwà to. Neitukù mwanjì kwenzela naawù muntu bibì to. Ncyèna musalùke to. Ndi mumanye anu menemene mwaba wùndì.

Kaa, pàndì ngeela meeji kùdiye, mukanku munene awu munkaci mwa kupaapala kuntwaku ne kwikila! Kwambaye ne: “Mèmè nèmMumanyè pààlwàYe.”

<sup>103</sup> Dìngà dituku ùvwa mwimane mwaba awu, ùyiisha. Baakwidi bàvwa dīshiyà, kwambabò ne: “Udi muswe kwamba ne nekùlwe cikondo cyùmushiibwà mulàmbù wà bwàcyàbwàcyà; ntempelu munene utùdì biibàke ewu, ne mudimu wònsò wutùdi benzèmu ewu, twètù dingumba dinene edi?”

Yèyè kwamba ne: “Nekùlwe cikondo cyùmushiibwà byònsò abi.”

“Kacyèna mwa kwenzekakù to. Wèwè udi muprofeta wa mashimi!”

104 Ki kukènzakanayè. Kwambaye ne: “Mònaayi, n’Yèyè wàwa! Mwaba wa dikuukwila musungula wà Nzambi’s ngwòwù wàwa. Mwànà wa mukooko n’Yèyè wàwa, Mwànà wa mukooko mulelèlè udi umusha mpekaatu wa bàà pa buloba.” Yèyè kàakamba ne: “Ki Méthodiste ulwàlwa ewu, ki Baptiste ulwàlwa ewu, anyi mwena Katolike” to. Wàkamba ne: “Ki Mwànà wa mukooko wà Nzambi udi umusha mpekaatu wa bàà pa buloba ulwàlwa wàwa.”

Mwaba wumwepele wa dikùbiibwa wùdìku mmu Mwànà wa mukooko wa Nzambi awu. Anu mu Yèyè nkàayèndè mmùdì lupàndu; kî mmu ekeleeziya, twitabàayi, cisàmbà, taatù, maamù kampanda nansha umwe, muntu wa cijila wa cijila nansha umwe, anyi cintu nansha cimwe, mwaba wa cijila to. Mmu Nzambi wa Cijila, Mukalenge Yesu Kilisto, mùdì Nzambi mutèèke Dìna Dyèndè pa Muntu, bwa bupikudi, Yèyè wàkafuta mushinga bwetu twètù bangènzàmpèkààtù awu. Ki mwaba wumwepele wùdì lupàndu. Pa Lubwebwe alu ki pàndi mèmè mwimane.

105 Yone wàkaMumanyisha. Wàkamba ne: “Ncìvwa muMumanye pàmvwà muMumòne wènda ùlwa apu to, kadi mwàmwà mùndi mupetèlè dilonga dya kàànyì kalaasa...” Kamùvwa mu seminere bu mwàkalongelà tatwèndè to; kî mbu mwakwidi, mulongèshìibwe to. Kadi mu cipèèlè, mùvwàye mu seminere wa tèlòjì wa Nzambi wa Bukole bwònsò, mwindile Dìyì dya Nzambi; kî ncìvwà kasùmbù kampanda kàà bantu katooyishe to, kadi cìvwà Nzambi mwambe bwa Cyòcì aci. Ne pàakatàngilà Yone muulu e kumòna Nyuma ùpweka, wàkamba ne: “Ndi mfla bujadiki ne, ewu ki Yèyè.” Kaa, ekelekele!

Ki mwaba wènù wà dikuukwila ngwòwù awu. Ki mwaba wènù wà cisokomenu ngwòwù awu. Mwànà wa mukooko wà Nzambi udi umusha mpekaatu wa bàà pa buloba nyawu. Kî ng’ekeleeziya to, kî ntwtàbàayi to, anyi cinyì cikwabo, kadi Mwànà wa mukooko wà Nzambi udi umusha mpekaatu wa bàà pa buloba.

106 Nudi numòna mwàkacitèèkà Yone anyi? Yèyè kàakamba ne: “Nwènù Bàfaalèsà nudi mu bulelèlè, nwènù Basadokà, beena Helòdè” to. Wàkamba ne: “Mwànà wa mukooko n’Yèyè wàwa.” Ki mwaba ngwòwù awu. Yèyè ngudi ne Dìnà adi. Ki Yèyè mene. Kakwèna dîngà dìnà mwinshi mwa Dyulu to!

107 Tàngilàayi mpindyewu cyàkambà Yesu bwa Yone. Dîngà dituku Yone kutùmaye bantu kùdìYe, bwa kumòna cìvwaYe wènza. Yesu kwambaYe bwa bwalu bwèndè ne: “Yèyè ngùvwa bukènkè bunene bùvwà bùkenkà abu,” bwa kubàleeja kajila kalelèlè kàvwà kàkèngelà bwa bòbò kulonda kumpala kwa dilwa Dyèndè, dilwa Dyèndè dya kumpala. Tèèlejàayi ne ntema. Kacinùpicì to. Yesu wàkamba ne: “Yone nguvwa bukènkè abu.” Maalàkì 3, kakùyì ntùpàkànyì to! Muprofeta wa bukènkè bunene bwa bùkenka abu ngwàkamanyisha Yesu bu Umwepele awu,

“Mwânà wa mukooko.” Bânà bàà mikooko bakwabo bàvwà baakwidi abu bàmba abu, ne bintu bikwabo byònsò abi, bivwa bikùtākàne. Uvwa “Mwânà wa mukooko” ki Yèyè ewu! Muntu wa bukènkè bunene bwa bukènka, uvwa Yesu wàmba ne nyèyè awu.

Maalàki 3 mmwambè ne: “Mémè nêntùme mùsànjeelà Wanyì kumpala Kwànyì bwa kulongololayè njila.” Ne ewu wàkatùmiibwa bwa kulongolola njila awu, ngwàkaMumanyisha, mwaba mwine. “Ki Yèyè awu! Kakwèna ntùpākànyì to. Ki Yèyè awu! Ndi mmòna cimanyinu cyènda cìMulonda. Ndi mumanye ne n’Yèyè; Bukènkè bùpweka bufùmine mu Dyulu ne bùlwa pa Yèyè.” Cìvwa cya citwishìibwe ne, ùvwa n’Yèyè.

<sup>108</sup> Dìbà adi, mwaneetu wa balume, ndi muswe nkukonkèku cintu kampanda, pànkaadi njikija apa. Tudi bafwànyìne kwamba nunku. Mu Maalàki 4, kí mbatùlayèku pèètù mukwabo mukanku anyì, Dikunji dya Bukènkè didi ne cya kwikala dyènda dilonda, bwa kuleeja ekeleeziya udi mupàmbùke mu dituku edi ewu ne Yèyè ùdi Ebèlù 13.8, “umwèumwè awu makeelela, leelu, too ne kashidi”? Kí mbatùlayèku ne mukwabo neàlwe wènda ùpaapala ùfùmina mu cipèèlè anyì? Amen! Aci’s m’Bulelèlè bwa menemene. Mushindu mwine wùdibi bikùmbanangana ne bìnwàngana ne Luukà 17.30, mwikalà Mwânà wa muntu (Mukanku) munkaci mwa kuDìbuulula bwa kuvwija cijèngù myaba mikwabo ya dikuukwila ayi, bu mùdi mangumba ne bikwabo!

Nzambi ngwàkasungula mwaba Wèndè Yèyè. Yone kwambayè ne: “Ki Wòwù awu!”

<sup>109</sup> Ne pashìishe mbatùlayè twètù cintu cimwecimwe aci mu dituku edi, Maalaki 4: “Bwa kwaluja myoyi ya bânà,” bwa kwamba ne Yèyè kí mmufwe to, bintu ebi kí mbya cikwabo cikondo to; dibàtiiza dya mu Dînà dya Yesu kadivwa kale wàwa to, kadi Yèyè udi umwèumwè awu mpindyewu. Amen. Bwa kuvwija myaba mikwabo yònsò ya dikuukwila ayi ne yìdi cyanàana, ki cìdi mukanku wà dituku dya ndekeelu ne cya kwenza, kuleeja ne bikwabo byònsò abi ndikùtakana, dingumba ndipàle, kadi kubàfunkwina cyakabidi ne cimanyinu cimwecimwe cyàkenzàYe aci ne, Yèyè ùdi umwèumwè awu makeelela, leelu, too ne kashidi. Aleluuyah!

<sup>110</sup> Kabidi, mu Bwàkabuulwibwà 4.7, tuvwa ne Nyama yinaayi yitwáfumu ku dilonga.

Wa kumpala ùvwa, twàsangànyì. . .tudi tusangana ne, ùvwa nntambwe. Awu ki Nyama wa kumpala wàkapàtuka bwa kuumusha kadyòmbò kàà dituku adi, Ntambwe wa Cisàmbà cya Yudà.

Paanyima Pèndè kulwakù Nyama uvwa ulonda. Ne tudi tusangana ne, Nyama uvwa ulonda ùvwa nngombe, udi nyama



Nekwikale Bukênkè lwà pa ìbaamulòòlò,  
 Kajila kàà ku Butumbi nenùkàpetè bushuwa;  
 Mu njila wa màyi ki mùdì Bukênkè leelu,  
 Bajiikùibwe mu Dìna dya mushinga mukole  
 dya Yesu.  
 Bânà ne bakolè, nyingàlálaayi ku mpekaatu  
 yenu yònsò,  
 Nyuma Mwímpè neàbwele bushuwa;  
 Makênkè a dilòòlò àfiki,  
 Mbulelèlè ne Nzambi ne Kilisto bàdi Umwe.

114 Kaa, mwaneetu wa balume, mwaneetu wa bakaji, pawikalà kùyi mwanji kunyingalala to, pawikalà kùyi mubàtùjùibwe mu Dìna dya Yesu Kilisto, udikù mwa kwela cidya cya mbilangilu aci dilòòlò edi anyi? Udikù mwa kupèèsha Nzambi mpungà wa kukwakidilaYè mu mwaba wùdì mwa kuMukuukwila anyi? Wavùluka ne, pa kuumusha mu wòwò mwaba awu, kakwènàkù mwaba nansha wumwe wùdì Nzambi mulaye bwa kutwilangana neebe ne kwakidila dikuukwila dyebe to.

115 Wèwè udi wamba ne: “Mwaneetu Branham, mèmè ntu nkuukwila anu ne meeji matòòke ònsò!” S’ki mwàkakuukwilà pèndè Kaayinà. Yèyè wàkafila mulàmbù wà mushindu wònsò wùwà Abèlè mufilè awu, kadi’s wùwva mulàmbù mubi. Udi mufwànyine kuya mu ekeleeziya, ne kufuta byadiikumi byebe, ne kwenza wèbè mudimu mùdibi bikèngela bwa mwena Kilisto kwenzaye amu, mwikàle ne meeji matòòke anu mùdì mulume anyi mukaji kanà yònsò ewu.

Ndi mwimane kaaba aka mpindyewu kùkaadi bidimu bitwè ku makumi asatu, mu cimenga cijimà eci, ngeela mbila mikole ya Mukenji wumwewumwe ewu. Nyewu nkààdi nkùlakaja. Ncyèna mwa kushààla neenu kabidi ntàntà mupitèpìte bule to. Kadi nwavùlukaayi ne, mu Dituku dya Cilumbulwidi, diyi dyànyì ndikwata pa mukàbà wà mèyi, ne nedyàkulè dinàngùke diikàle dikupiiisha.

116 Kùdì mwaba anu wumwepele wùdì Nzambi ùtèèka Dìna Dyèndè, ne wòwò awu kì mmu ekeleeziya to, kadi mmu Yesu. Kùdì mwaba anu wumwepele wà dikuukwila, mwaba anu wumwepele wùdì wakidiibwa, ne mwine awu mmu Munanga, Yesu Kilisto. “Kakwèna dīngà dīnà mwinshi mwa Dyulu, dipèèsha bantu, kùdibo mwa kusungidiibwa to,” kī ng’ekeleeziya, kī ntwitabààyi, kī ncintu nansha cimwe to. Yesu Kilisto!

Nenku aci ki cidì ne cya kwikala Mukenji wà dībà edi ne: “Kwalujulula m̄yoyi ya bânà, ku Diitabuujà dyàkafidiibwà kale wàwa kùdì bansantu.” Kwènàku muswe kuWitaba dilòòlò edi anyi?

Nenku patùcìdì ne mitu yetu miinyika apa.

117 Nenku aba bàdi baswè bwa tùbàvùlùkè mu disambila abu, swàyi nwèlè anu byanza muulu cyanààna. Katwèna mwa kwenza dibìikila dya ku cyoshelu to, bwalu bantu mbapite búngi. Nzambi anùbènèshè. Ekelekele! Ku dyàbakàji dyànyi eku, ngeela meeji ne kùdi nkama yisatu.

118 Mpindyewu ku dyàbalùmè dyànyi, swàyi nwèlè byanza muulu, nwàmbè ne: “Ndi muswe bàmvlùkè.” Ngeela meeji ne kùdi lukama ne makumi ataanu, anyi bapite apu, ku dyàbalùmè dyànyi.

Tudi ne tabernacle kwinshi eku mwikàle ne ciinà cinènè cya mâyi; mpaasàtà, mpaasàtà wa maalu mîmpè, Mwaneetu Orman Neville, bakwàcishi, bantu bàà muneemu mwònsò emu banùdi numòna ne nutwilangana naabo aba. Dituku dyònsò, dilòlò dyònsò, dîbà dyònsò, bantu bàdi baswè kubàtìijibwa, bàdi banyingàlale abu, ciinà cya mâyi aci cìdi misangu yònsò anu cindile. Nenku wèwè mutùmikile diyì ditùma adì, udi mutwishìibwe, ku mulayi wà Nzambi ne, wèwè ne meeji matòòke mu mwoyi wèbè, neùpetè dibàtiiza dya Nyuma Mwîmpè.

119 Kùdi mwaba wà dikuukwila anu wumwepele. Mpindyewu, aci kî mmu tabernacle to. Aci mmu Kilisto. Tudi tubwela munda Mwèndè munyi? “Ku Nyuma umwe nkutùdi bònsò babàtìijibwe mu Mubidi wumwe.”

Tùsambilàayi.

120 Nzambi munanga, pàdi byanza ebi byediibwe muulu, bìvwa byùmvwija cìvwà mwinshi mwa cyanza aci mu mwoyi, ditwishìibwa dya ne ncyà bushuwa ne bàdi bàjinga dyambulwisha dya Kùdi. Ndi ndòmbela yònsò wa kùdìbo, Taatù. Ne mèmè nènteelè Diyì Dyebe. Wèwè wákamba ne: “Ewu udi umvwa Diyì Dyànyi, ne wìtabuuja Ewu udi muNtùme, ùdi ne Mwoyi wà kashidi, ne kààkupìcila ku Cilumbulwidi to; kadi mmumùke ku lufu muye ku Mwoyi.”

Taatù, anu dyumuka dya mu cimenga emu bwa mbingu mikese cyanààna, dya ngaalukila, nkonka ne: “*Kampanda ewu bishi?*”

“Kaa, awu’s ùyiilè.”

“Ee, kadi bwa . . .”

“Ûyiilè.”

121 Nzambi munanga, ku umwè ku umwè tudi tubìikidiibwa, ku umwè ku umwè nkùdìbi bìkèngela bwa twètù kuumusha kadyòmbò kàà kupicila mu cibandabanda cya mundidmbi wà lufu. Ne cìdi bwa umwe ne umwe wà kutùdi, twètù bu bàà cìfwàkà. Kadi, dilòlò edi, nyewu Watùtèèkedi dilòmbà Dyebe kumpala kwetu, bwa ne twètù baMwitàbùje ne babàtìijibwe mu Dîna Dyèndè, Wèwè neùtùbwejè. Ne pashìshe mu mwine Mubidi ewu, Mubidi wà Kilisto ewu, kamùyi mu ekeleeziya to, kadi mu Mubidi wà Kilisto, Mubidi awu



wùkaadi mumane kulumbulwishiibwa. Kabyàkukèngela bwa kulwawù ku Cilumbulwidi nansha. Nzambi wàkiicikija ciji Cyèndè cicolè pa mubidi awu, ne mubidi awu mmudishikàmìne ku mpekaatu; nenku, bu mutùdì munda Mwèndè, aci cidi citùumusha ku bupika bwa mpekaatu, ku Difuta Dyèndè dya cibawu pàakafwàYe pa kaaba keetu adi. Ne mwômò amu tudi mu bwobumwe muntu ne mukwèndè, pàdì Mashi a Yesu Kilisto, Mwànà wa Nzambi, àtùlama bakezùke ku mpekaatu ne ku dikooiyika dyònsò.

<sup>122</sup> Taatù Nzambi, ndi ndòmba bwa Wèwè kubweja yònsò wa kùdìbo mu Bukalenge Bwebe. Enzàku nanku, Nzambi. Swàku bwa kakwikadikù nansha umwe wà kùdìbo wajìmina to; kàkujiminyikù nì mmwànà wa balume anyi wa bakaji, muntu mulume anyi mukaji to. Mukalenge, bamwe bàà ku beena famiye wanyì nyewu basòmbe kaaba aka, dilòlòlò edi, bàdì kabàyi mwinshi mwa Mashi awu. Mushindu mwine wùndìku mwa kuvùluka anu bitòoke tòò mèyi a papa wanyì! Ne ndi ndòmba, Nzambi Munanga, bwa nansha umwe wabò kàjiminyikù to. Enzàku nanku, Mukalenge. Ndi muKwitàbùùje mpindyewu, ne cyànyì pàànyì cyònsò cìndìku mwa kwitabuuja naaci aci.

<sup>123</sup> Kwàtakù mudimu pa bânà beetu bàà balume, bânà beetu bàà bakaji, balunda bàànyì, bàdì kaaba aka dilòlòlò edi ne bàdì bàtèelejilà ku telefone abu. Provinces yàbùngì mishilèshilàngàne yidi munkaci mwa kutèeleja, kuumukila anu ku Côte Est too ne ku Ouest. Ndi ndòmba, Nzambi Munanga, dya luseke lukwabo lwà bipèèlà mwàmwa mu Tucson, mu Californie mwàmwa, kwàka ku Nevada ne ku Idaho, ku Esete menemene ne mu nyungulukilu amu, mu Texas mwàmwa; pàdì diibiikila edi difidiibwa apa, bantu basòmbe mu—mu tuèkèleeziyà tukese, mu byujidi bya túsòloonyì, mu nzubu, munkaci mwa kutèeleja. Éyi Nzambi, swàku bwa muntu mulume anyi mukaji udi mujimìne awu, nsongàalùmè anyi nsongàakàji awu, pa dîbà edi, àlwekù Kùdì. Enzàku nanku anu mpindyewu ewu. Tudi tucilòmba mu Dîna dya Yesu ne, bàpetèku mwaba wa dikùbiibwa ewu pàcidiku dîbà apa.

Pàdìbi ne, tudi tumòna mufùndù ku cimano, buloba munkaci mwa kubìnduluka, cikondo cya disungidiibwa cìkaadi pabwîpì. Citùpà cya ditunga dyetu cìkaadi cyènda citùkina, cikwabo citùpà cituuta mavwala ne cibwayika ku dikanka dya buloba, mùvwà Yesu mulayè ne mmwìkalàbi. Kabitàmbikù kulepa bwàbò bòbò to, Mukalenge. Swàku bàcìtábè mpindyewu, bwalu tudi tubàleeja Kùdì bu bivùlukilu bya masangisha aa, bya Evanjeeliyo, mu Dîna dya Yesu. Amen.

<sup>124</sup> Nudi baMwitàbùùje anyi? Nzambi ànùbènèshè. Mbanganyì bàdì biitabuuja ne m'Bulelèlè, ku dyàbakàji dyànyì eku? Ela cyanza muulu. Mbanganyì ku dyàbalùme dyànyì? Ela cyanza muulu. Nzambi ànùbènèshè. Bwa ku dyànyì dimòna, mbantu

bônsò. M'Bulelèlà, balunda bàanyi. Nzambi mmumanye ne ncilelèlà.

<sup>125</sup> Mpindyewu paùdi munda Mwèndè, ne mwikàle munda Mwèndè, udi mwa kupeta byônsò byàkafwilàYe abi. Ne cyàkafwilàYe ncinyi? “Yèyè wàkatàpiibwa mputà bwa kushipa kwetu kwa mikenji, wàkazaajiibwa bwa bubì bwetu; dinyooka bwa ditalala dyetu dyàkapòna pambidi Pèndè, ne ku mibùndàbùndà Yèndè twàkondopiibwa.” Nudi nwitabuuja nanku anyi? Nudi nwitabuuja difuta Dyèndè dya cibawu bwa dyondopa mpindyewu anyi?

<sup>126</sup> Kùdi babeedi munkaci mwetu anyi? Bèlèku byanza muulu, ku dyàbalùme anyi ku dyàbakàji. Misumbà minene ya mabeedi. Ncyèna mwa kubìikila mulongo to. Nudi numòna's, ncyèna ne. . . kanwèna mwa kubànda pa cibumba cya ku cyambilu to. Kakwèna mushindu wà kucyènza to.

Bàdi munkaci mwa kwenza masangisha a milombo mu myaba mikwabo, bwa babeedi, mu maèkèleeziyà ne bikwabo, mu tabernacle mwàmwa.

Nènnùlòmbèku cintu kampanda. Mbanganyi bàdi beena kwitabuuja kunùdi aku? Ela cyanza muulu. Eyo. Nènnùtèèlèlè Dìyi, didi Kilisto adi. Mudimu mutùmangana naawù wà Yesu wà ndekeelu kùdi bàà pa buloba, to, kadi kùdi Ekeleeziya's wè, Yèyè wàkamba nunku: “Bimanyinu ebi nebìfilè aba bàdi bìitabuuja; bôbò batentèkèle babeedi byanza, babeedi nebàsangalè.” Mbanganyi bàdi bamanyè ne aci ncilelèlà, Maakò 16, bàmbe ne: “Amen.” [Disangisha didi dyàmbe ne: “Amen.”—Muf.] Eyo. Mèmè ndi nkulòmba wèwè bu mwena kwitabuuja bwa ùtentekelè muntu udi kumpala kwebe aku awu byanza. Tentèkèlà wèwè anu muntu udi kumpala kwebe aku awu byanza, nenku twètù bônsò muntu ne muntu twènzè disambila bwa muntu ne mukwèndè mpindyewu. Tentèkèlà wèwè muntu udi pabwîpi neebe apu awu byanza.

<sup>127</sup> Mukalenge, kumpala kwànyì eku kùdi kashèètè kàà mishwalà, tupese tukese twa bilàmbà; maamù mukùlakàji kampanda mulàadika mwaba kampanda, ùpunga ne lufu, mwànà wa mu diboko pabwîpi ne lufu, babeedi myaba yônsò. Tudi tubala mu Bible ne bàvwa bàngata mishwalà ne tulùlù bìvwà pambidi pàà Pòlò, ne bàvwa bàbitenteka pa babeedi; ne nyuma mibi, ne nyuma ya makooya, ne mabeedi, ne màsaamà, bìvwa byùmuka pa bantu. Mpindyewu, Mukalenge, tudi bamanyè ne twètù katwèna Pòlò Munsantu to, kadi tudi bamanyè ne Wèwè ùcidi mushààle anu Yesu, mwaba wumwepele wa dikuukwila wùdi Nzambi mulongòlòle. Nenku mpindyewu, leelu ewu, bantu aba nyewu bajìkùle diitabuuja dyabo dimwedimwe adi, bu ne bàdi bìitabuuja mùvwà bantu abu bìitabuuja amu. Ncya bushuwa ne Wèwè udi mùbàsebèèle njila! Nenku nyewu ntenteka byanza byànyì pa mishwalà eyi ne

ndòmba bwa ne màsaamà ne ntatu byùmukè pa mibidi ya bantu bààbitentekelàbo abu mu Dîna dya Yesu Kilisto.

<sup>128</sup> Mpindyewu, tutu bayiilè ne, pàvwà Izaleela munkaci mwa kupàtuka mu Ejiipitù, mu njila wa mudimu, bàvwa mu njila batàngile ku buloba bulaya. Mbû Mukùnze kubàcyàmakanayè mu njila. Ki Nzambi kutùmaYe mèsù panshi ùtàngidila mu Dikunji dya Kapyà, ki mbû kukwàcikayè bwôwà, kudisàkayè paanyima, ne kulekelaye Izaleela ùpita ùya ku buloba bulaya. Èyi Nzambi, tùmakù mèsù panshi utàngidila mu Mashì a Yesu, dilòòlò edi, ne swàku bwa mabeedi àdisàkè paanyima, ne Sàtaanà ìpaciibwè. Ne swàku bwa bantu bàpitè bàye ku mulayi awu wà mubidi tumatuma ne makàndà, kùdì Nzambi mwambe ne: “Kumutù kwa maalu ônsò, ndi muswe bwa ùtantè mu bukole bwa mubidi.”

<sup>129</sup> Mpindyewu pa Ùdì umòna kwàka apu, Mukalenge Yesu, byanza bya bantu aba bitentekelangana muntu ne mukwèndè, bàdì munkaci mwa kuleeja mu cimfwànyì diitabuuja dyabo, ciWakambà aci ne: “Bimanyinu ebi nebìfilè aba bàdì bìitabuuja.” Bàdì bàsambidilangana mu mushindu wàbò sungasunga, muntu bwa mukwèndè. Muntu udi ku luseke ùdì ùbàsambidila.

<sup>130</sup> Mpindyewu, Mukalenge, aka kadyòmbò kààmányì kuumushiibwa, kàà ne Sàtaanà, mwenji munene wa mikaaka awu, kèna ne bukenji bwa kushààla mulamine mwànà wa Nzambi panshi to. Yèyè ùkaadi cintu cicìmuna. Yesu Kilisto, mwaba wumwepele wà dikuukwila awu, Dîna dimwepele dilelèlè adi, wàkamucìmuna ku Kalvariyo. Ne tudi tusòka Mashì Èndè mpindyewu mene, bwa ne Yèyè wàkacìmuna bubeedi bwònsò, dìsaamà dyònsò.

Neuku ndi ntùmina Sàtaanà dìyì bwa kuumukayè mu batèèleji emu. Mu Dîna dya Yesu Kilisto, pàtukà mu bantu aba, bwa kuvwijiibwàbò badishikàmìne.

<sup>131</sup> Muntu yònsò udi witaba dyondopiibwa dyèndè mwimànyìne pa Dìyì difùnda, fila bujaadiki bwebe pa kujuukila kuulu ne kwamba ne: “Ndi ngiitaba mpindyewu dyondopiibwa dyànyì mu Dîna dya Yesu Kilisto.” Juukilà kuulu.

Butumbi bwikalè kùdì Nzambi! Ki bwalu mbwòbù abu's. Tàngilàayi kuneeku, bikalàbà ne bakwabo munkaci mwa kujuukila kuulu. Butumbi bwikalè kùdì Nzambi! Ki cyôci aci. Itàbùùjaayi anu cyanàànà. Yèyè ùdì kaaba aka. Bilenga bya dikema!

<sup>132</sup> Mu batèèleji amu, pambelu, ku nshinga, s'bvìvwa bikèngela bwa nwènù kumona's! Ngeela meeji ne muntu yònsò mwaba ewu, ku dyànyì dimanya, anyi pabwìpi ne bònsò, mbiimàne kuulu pa dîbà edi. Kàà, cikondo bulenga kaayi! Bwikadi bwa Mukalenge, ki cyôci! “Mwaba wùdì Bwikadi bwa Mukalenge, pàdì budìikadidi, pàdì budìshikaminyi.” Nyuma wa Nzambi ùdì ùtùvwija badishikàmìne.

<sup>133</sup> Mpindyewu watwòndòpùYe ewu, tudi tuciitabuuja. Yèyè mmutùsùngile; tudi tuciitauuja. Aba bàdi baswè kubàtijiibwa, ciinà cya màyi ncindile. Dìbà kanà dyònsò, pa dìbà dyònsò dyùdi muswe kulwa adi, nekwikalè muntu kuntwaku bwa kucyèza.

Nenku mpindyewu ndi ngeela meeji ne, kumpala kwa twètù kujikija, bivwa bikèngela bwa twètù kwimbakù musambu wà kale wà ekeleeziya. “Ndi muMunange, ndi muMunange bwalu Yèyè wàkannanga kumpala.” Twèlàayi byanza muulu kùdi Nzambi ne tùwìmbàayi ne myoyi yetu yònsò!

Tudi baswe kutwilangana neenu kaaba aka mu dinda, pa dìbà citeema ne citùpà, mu citanda cimwecimwe eci, bwa cyena-bwalu cya *Dibàkà Nè Difwà Dyà Dibàkà*. Eyo.

Tùwìmbàayi cyàpàmwè mpindyewu.

Ndi muMunange,

Musùmbà munene wà batèeleji ewu wùwìmbè mpindyewu! Bàdi ku nshinga kwàka, wìmbàayi, nwènù pèènù.

Bwalu Yèyè wàkannanga kumpala  
Ne wàkampetela lupàndu  
Ku mucì wà Kalvariyo.

<sup>134</sup> Cyàkenjiibwa penyì? Ku mucì wa Kalvariyo. Patùdi tuwìmba cyakabidi apa, ndi muswe ùlabulèku muntu udi pabwìpì neebe awu ku cyanza, wamba ne: “Nzambi àkubènèshè, mwena lwendu.”

Ndi . . . ( . . . ? . . . )

Bwalu Yèyè . . . kumpala  
Ne wàkampetela lupandu  
Ku . . .

<sup>135</sup> Kaa, kanwènaayikù baMunangè anyì? [Disangisha didi dyàmba ne: “Amen.”—Muf.] Yèyè kî mmulenga mulayà anyì? [“Amen.”] Yèyè m’Mwaba wèbè wà Cisokomenu anyì? [“Amen.”] Yèyè ùdi Lubwebwe mu buloba bwatùke, Ciikishilu mu cikondo cya cipeepèlè cicolè, Cinyeemenu cimwepele cindiku mumanye. Kì bwa cinyì:


Diitabuuja dyànyì nditàngile kuulu Kùdi,  
Wèwè Mwànà wa Mukooko wa ku Kalvariyo,  
Musùngidi wa kùdi Nzambi;  
Mpindyewu ngumvwilèku pàndi nsambila apa,  
Umushà dipiilà dyànyì dyònsò,  
Anyishàku bwa kuumukila ku leelu  
Mèmè yònsò ngiikalè anu Webè!

Twèlàayi byanza muulu patùdi tuwìmba apu.

Diitabuuja dyànyì nditàngile kuulu Kùdì,  
 Wèwè Mwànà wa Mukooko wa ku Kalvariyo,  
 Éyì Musùngidi wa kùdì Nzambi;  
 Mpindyewu ngumvwilèku pândì nsambila apa,  
 Umùshàku mpekaatu wanyì yònsò,  
 Eyi, anyìshàku bwa kuumukila ku leelu  
 Mémè yònsò ngiikalè anu Webe!

Twìnyikàayi mitu yetu mpindyewu patùdì tuwìmbila mu matama apa.

Pândì ngendela mu nyòngòlò wa mîdimà wa  
 njila mibwelakane wa panwapa apa,  
 Ne pàdì lutatu lùpaasalala lunnyùngulukila,  
 Wèwè ikàlà Mulombodi wanyì;  
 Tùminàku mîdimà dîyì bwa yàndamukè  
 muunya,  
 Kùpulàku binsonji bya tunyinganyinga,  
 Kùndekèdiku mpàmbuka  
 Nya kule ne luseke Lwebe nansha.

Panùcìdì ne mitu yenu miinyika apu, mpaasàtà wetù munanga, Mwaneetu Orman Neville, neàtangalajè batèèleji. 

*MWABA WÀ DIKUUKWILA MUSUNGULA WÀ NZAMBÌ* LUA65-0220

(God's Chosen Place Of Worship)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu diisambombo dilòlò, mu matuku 20 a ngondo mwibidi, cidimu cya 1965, ku Parkview Junior High School mu Jeffersonville, Indiana, U.S.A. Ndyumusha pa mukaba wa mêyi ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)

## Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)